



Dia ol rita bilong Wantok Niuspepa, klostu nau bai yu ken salim o teksim ol Tingting na Wari bilong yu i kam long Wantok Niuspepa...Sambai na redi tasol..



Ulamagi!



WELKAM LONG MAOPA PM: Long makim ol pipel bilong ol, tupela yangpela meri bilong Maopa ples long Aroma, Sentral Provins i holim han bilong Praim Minista, Peter O'Neil, na kisim em i go long ples bilong seromoni we ol lain bilong Maopa ples yet i amamasim 127 yia bilong Yunaited Sios long ples bilong ol. Mista O'Neil na ol Palamen memba bilong Sentral Provins i bin go long dispela ples long las wik Fraide bilong givim sampela helpim long sanapim nupela haus lotu long ples Maopa. *Poto Nicky Bernard*

Givim bek pawa long Hailens LLG: Webster

- Webster tok Trawen abusim pawa na atoroti

- Trawen tok disisen bilong em i fainol

Stanley Nondol i raitim

DAIREKTA bilong Nesenel Rises Institut (NRI) Dokta Thomas Webster i singaut long Iktorel Komisina Andrew Trawen long rausim desisen bilong em long kenselim 19 LLG long Hailens provins.

Dokta Webster i tok disisen bilong Mista Trawen i no beis long gutpela polisi na lo na mekim wanman disisen na abusim pawa na atoroti bilong Sif Komisina.

I go moa long pes 2...

Toksave!


Word Publishing Opis bai pas long Fraide Ogas 30. Mipela bai stap long wanpela Inhaus Woksop. Sori tru long dispela! Opis bai op gen long Mande.

MI SAVE TOKTOK OLGETA DEI

Prem tasol 59 Tawa long wanpela manit insak long first 3 manit na kiam nupela 17 manit FRL. Revider "Talk" tigo bi 1000 mau.

EVERYDAY TALKER

59t
PER MINUTE



Digicel



DIGICELPNG.COM



Polis stopim tulait tulait bus

Bustin Anzu i raitim

POLIS long Lae Siti na Nesenel Rot Sefti Kaunsil i laik stopim ol PMV bas i save kam pasindia long Hailens Haiwe i go kam long nait.

Olgeta mas kisim o ronim pasindia long san tasol.

Planti i no wanbel long dispela tingting na ol i straik.

Bos bilong polis long Lae, Superintenden Iven Lakatani, i tok planti ol draiva bilong tulait tulait PMV bus i no save kisim gutpela malolo long slip olsem na i save kamapim planti birua long rot.

Wanpela gutpela piksa em long wanpela PMV bus i bin kapsait wantaim ful lod pasindia long Baiyer, insait long Westen Hailens Provins long stat bilong dispela yia.

Lakatani i tok stopim ron bilong ol PMV long nait em i gutpela long daunim dispela hevi.

Planti ol draiva i go kamap long Mt Hagen na bihain, joinim gen i go long Mendi o Wabag, we i no gat gutpela malolo bilong ol.

"Planti ol draiva i no save gat gutpela malolo. Ol i go kamap long Hagen na senisim ol pasindia

na skruim wokabaut i go long Mendi, Wabag o Pogera na ol narapela ples tu. Ol i no givim gutpela malolo long bodi bilong ol.

"Bodi i mas malolo. Tasol ol i no save givim dispela malolo na mekim bodi i les olgeta. Dispela i ken kamapim bikpela birua long kar. Mipela mas stopim dispela nau yet," em i tok.

Bik bos bilong Nesenel Rot Sefti Kaunsil, Nelson Terema, i sapotim tingting bilong Lae polis long stopim dispela nait raun bilong ol PMV bus.

Em i tok nau yet, planti hevi bi-

long birua long rot i save kamap long ol kain PMV draiva i no gat gutpela slip na i save draivim kar long nait.

Tasol planti ol bas draiva na papa bilong kar i no amamas long dispela tingting.

Ol i tok ol laik ronim long nait taim tu na i no long san tasol.

Long las wik long Lae, planti PMV bas i straik o i no amamas long dispela tingting na rausim olgeta PMV bas bilong ol long Eriku.

Ol i tok i no olgeta i save kamapim kain hevi bilong rot eksiden na ol i laik ron long nait tu.

Dispela ron long nait tu i save helpim ol longwe lain olsem Mendi, Tari, Ialibu, Enga, Pogera na ol narapela ples long joinim wokabaut bilong ol taim ol i kamap long Hagen.

Ol no ken go long apinun na nait long Mount Hagen na bihain painim ples bilong slip long taun.

Bipo, tulait tulait bus sevis em long ron long Lae i go long Hailans tasol.

Nau em tulait tulait bas i ron long tupela ples wantaim, Hailens kam daun long nambis na nambis i go antap long Lae.

Pablik sevis i slek tumas

Bustin Anzu i raitim

OL pablik sevis bilong Morobe Provinsel Gavman i slek na ino save long mekim wok bilong ol na sapos em inap bai em rausim ol long wok.

Gavana bilong Morobe Provins Kelly Naru i mekim dispela tok.

Em i tok planti ol developmen baset bilong ol long provins i no kamap na em i no save olsem wanem bai ol developmen insait long 9-pela distrik bai kamap.

"Planti ol driman tingting bilong mi insait long provins i no go het long wanem ol Pablik Sevan insait long provins i no wok.

Ol developmen baset bilong ol

distrik i no kamap long putim long baset bilong ol.

"Ol manmeri husat bai mekim wok i slek na i no putim dispela plen.

"Na dispela bagarapim ol plen bilong em long kirapim Provins," em i tokim ol niuslain long las wik.

Em i tok tu olsem planti sevis i no go long ol ples long wanem ol manmeri husat bai stap na kisim sevis i slek long mekim wok.

Em i tok em i gat tingting long rausim ol long wok na kisim ol nupela wokman meri husat bai mekim wok.

Gavana i tok em bai stat long opis bilong em yet na i go daun long distrik administreta long wan-

wan distrik level.

Long wankain taim tu, Memba bilong Palamen long Menyama, Philip Benjamin, i gat wankain hevi olsem.

Ol pablik sevan bilong em long distrik tu i no wok na em kisim taim long givim sevis i go long ol lain bilong em long ilektoret.

"I mas gat gutpela luksave long wok namel long ol politikal lida, provinsel edministresen na ol tim lida na ol wokman.

Nau yet, dispela ino stap olsem na nogat wok i kamap long distrik na provinsel level. Dispela i givim mi hetpen na mi wari olsem ol lain pipel bilong mi bai no inap kisim ol gavman sevis," em i tok.



HARIM: Praim Minista Peter O'Neill i harim ol wari bilong ol woklain long Angau Haus sik.

Dadae na Siniwin i wok bung

Bustin Anzu i raitim

TUPELA Memba bilong Palamen (MP) bilong Lae i bin bungim tingting na sainim wanpela pepa o memorandum ov andastending (MOA) long wok bung wantaim long bringim gavman sevis i go long Ilektoret bilong tupela.

Memba bilong Kabwum Bob Dadae na wanwok bilong em long Nawaeb, Gisuwat Siniwin, i bin sainim dispela pepa long namba wan taim.

Tupela i bungim tingting long skelim ol risos bilong tupela na save na wok bilong kamapim ol gutpela rot netwok insait long ilektoret em bai tupela i skelim tu.

Kamapim ol liklik kopi bisnis, kamapim gaden kaikai na painim maket bilong ol em bai stretim gut sampela save long ples tu.

Kamapim gutpela rot na komyunikesen netwok em wanpela hevi bilong dispela tupela ilektoret na em sampela eria we i gat bikpela nid, na tupela bai wok bung wantaim long daunim.

Tupela memba, Dadae wantaim Siniwin, i stap insait long pati bilong Praim Minista, Peter O'Neill, na Pipel's Nesenel Kongres (PNC), na ol i tingting long lukim Praim Minista na Gavana bilong provins, Kelly Naru.

Mista O'Neill i bin tok promis long givim wanpela K5milian long bungim tupela provins na go kamap long Raikos Madang.

Dispela hap ol ples we i no gat rot i joinim ol. Na rot bilong ol long go kam long Lae siti em long ran long solwara o kisim balus.

Long wankain taim, Siniwin i tok ol i nidim K50 milien long kamapim ol rot netwok sistem insait long provins.

Siniwin, husat i kamap memba namba wan taim i tok maski ol lain bilong em i skelim wanpela boda wantaim Lae siti, ol pipel i save lukim ol bikpela lait long ples, tasol nogat wanpela sevis i kamap long ol.

"Mipela i lukim dispela na laik kamapim sampela kain histori long bihain taim, na kisim ol sevis i go long ples.

Polis holim pasim na sasim Sharp

LONG dispela wik, polis long Is Nu Briten Provins i holim pasim na sasim Peter Sharp, papa bilong sip MV Rabaul Queen i bin bungim birua las yia na planti pipel i bin dai.

Ol bin sasim em long dai bilong 162 pipel ol bin painim dai bodi bilong ol bihainim birua bilong MV Rabaul Queen long Februeri 2 las yia.

Sip i wok long mekim ron i go long Lae, Morobe Provins, wantaim

moa long 400 pasindia planti bilong ol i bilong ol Niugini Ailans provins olsem Is na Wes Nu Briten, Bogenvil, Nu Ailan na ol narapela moa.

Em bin bungim birua long solwara bilong Finsafen, Morobe Provins na planti pipel i bin dai. Ol bin painim bodi bilong sampela, tasol planti moa tu em ol i no bin nap long painim ol.

Dispela em bikpela birua long

solwara tru long histori bilong PNG.

Wok painimaut i bin kamap long dispela.

Ol polis investigesen lain i skruim ol wok painimaut bilong ol we i lukim ol i holim pasim na sasim Mista Sharp long dispela wik.

Mista Sharp i gat 69 krismas na em i bilong Scotland long Inglan.

Famili bilong em i stap long siping bisnis longpela taim na olsem, Mista Sharp i bin statim wok long

siping bisnis taim em i gat 16 krismas.

I kam inap nau, em i gat 53 krismas long wok long siping bisnis.

Ol ripot i tok polis bai skruim yet wok painim bilong ol na ol bai holim pasim sampela moa woklain bilong MV Rabaul Queen.

Planti pipel long ol NGI provins i stap yet wantaim sori long ol family na hauslain bilong ol i lus long dispela sip birua.

Givim bek pawa long Hailens LLG: Webster

I kam long pes 1...

Dokta Webster i tok no gat lo long Mista Trawen long bihainim long kenselim ileksen. Em tok lo i no tok klia long Ilektorel Komisina bai kisim tok orait long husat stret long kenselim ileksen na dispela ken mekim Komisina Trawen i mekim wan man disisen na abvisim pawa.

Mista Trawen i tok em i no inap senisim disicen em mekim long las wik long kenselim 19 LLG long Hailens. Na em i givim tok lukaut long ol lidas bilong Hailens na PNG long rspektim lo na no ken mekim kain kain samting long kirapim hevi long disisen em bin mekim.

Mista Trawen tok disisen

bilong em i fainel na em bai no inap senisim. Em tok sapos ol kendidet, sapota na lida bilong wanpela LLG long kantri i egensim disisen bai lukim dispela LLG bai i no inap holim ileksen long bihaintaim.

Las Wik Mista Trawen yusim pawa bilong em aninit long seksen 97(1)bilong Ogenik lo bilong Nesenel na Lokel-Level Gavman Ilekzen na kenselim 19 LLG long sikspela hailens provins.

Dokta Webster i tok Komisina Trawen i no kisim etvais na ripot bilong Provinsel Ilekzen Menesmen Komiti. Em tok ileksen long PNG em dia na gav-

man yusim bikpela milien kina.

Dokta Webster i tok Mista Trawen i no laik kenselim ileksen long taim bilong poling sapos gat bikpela hevi kamap. Em tok kaunting kamap na planti sia ol tokaut long wina pinis na gat liklik taim tasol long pinisim olgeta kaunting na tokaut long wina.

Dokta Webster i tok em bai hat long kamapim ileksen gen long ol dispela LLG na singaut long mista Trawen long rausim disisen bilong em.

Sikspela provins em Enga, Westen Hailens, Jiwaka, Isten Hailens, Sauten Hailens na Hela.

Mista Trawen i tok, em

kisim planti ripot bilong vailens, pretim fridom bilong vota, haijekim na bagarapim ol balot bokis na pepa, pait, bagarap kamap long poling ples, ol vota givim giman nem long taim bilong vot, nogat fridom bilong ol meri long vot na planti trabel tru i kamap.

Ol LLG Trawen kenselim em, ENGA(Kandep, Wage), WESTEN HAILENS (Hagen Aben, Hagen Rurel, Mul, Kotna, Muglamp), JI-WAKA(Not Wagi, Saut Wagi, Anglimp) ISTEN HAILENS (Goroka Aben, Gahuku, Lowa Bena, Lowa Asaro), SAUTEN H A I L E N S (I a l i b u , Mendi, Poroma), HELA(Tari Abem)

Westen helt program kisim K20m

Westen Gavena Ati Wobiro givim marasin long liklik bebi long Aiambak long han bilong JTA nes meri. OTML Menesing Darekta Nigel Paker sanap na lukluk.



Stanley Nondol i raitim

OK TEDI Mining Limited i fandim helt program we Jane Thomas na Asosiet o JTA i menesim long K20 milien tasol i gat nid long patnasip namel long Fly gavman, nesanel gavman na divelopmen patna long daunim ol kainkain sik long provins

Progreman menesa bilong Helt Sevis JTA, Kelly Kewa i tok patnasip em nambawan rot long daunim ol kainkain sik long Westen provins.

Mista Kewa i mekim dispela tok las wikend long Aiambak, Midel Flai distrik long graun breking seremoni bilong K20milien helt program. EM i tok, 27 indiketa long kainkain sik long provins i stap long mak daunbilo long 50 pesen. Em tok dispela em i mak nogut.

Mista Kewa i tok marasin bilong kilim sik TB i no wok long planti bilong ol sik lain long Westen provins bilong wanem, planti hap long Westen provins i no gat besik helt sevis na ol siklain i no bihainim rot bilong kisim marasin.

Mista Kewa i tok moa long 300 manmeri na pikinini i gat sik TB na stap long marasin na planti bilong ol i divelopim Malti Drag Resistens pinis na marasin ol kisim i no moa wok.

Mista Kewa tok planti TB lain i divelopim resistens bikos, ol ino kisim marasin long rot dokta i tok. Na ol i no go kisim marasin kwik taim ol i painim sik TB. Mista Kewa tok planti i no save kisim marasin bikos nogat

helt senta o klinik klostu. Planti tu no save go rivi u o sekim ol yet gen long haus sik.

Mista Kewa husat bosim helt program bilong JTA long Not na Midel Flai i tok, i gat bikipela wok tru long daunim kainkain sik long provins.

Ol distrik long Saut na Midel flai na sampela long Not Flai i no kisim helt sevis long 22 yia, na kainkain sik bagrapim ol pipel na planti i dai.

Mista Kewa i tok Westen provins em bikipela tru na nidim patnasip namel long ol stekholda olsem gavman, Flai riva provinsel gavman, OTML, Nesanel gavman na ol arapela divelopme patna long wok bung long daunim ol hevi bilong sik.

Mista Kewa i tok tim bilong JTA i mekim patrol raun long ol viles long Not na Midel Flai. Em tok JTA bai makim ol Viles Helt Volantia long ol viles na skulim ol long fes aid na ol arapela rot bilong helpim ol siklain.

Nogat rot long planti hap long midel na Saut Flai na wara, huas sik, edukesen sevis na no gat aidpos long ol pipel kisim sevis.

Mista Kewa i tok aninit long OTDF na JTA program olgeta mama na pikinini bai kiism sut o imunaisesen na tim bai patrol long olgeta viles long sekim ol manmeri na .

Westen provins em bikipela eria tru na no gat rot long planti viles, ol pipel save yusim bot o kalap long liklik balus long kisim sevis na dispela save kosim bikipela mani.



JTA Helt Progreman Menesa, Kelly Kewa. Ol viles lain long Aiambak long Midel Fly taitim rop long het bilong em na mekim kamap sif long mekim helt wok long eria.

WESTERN UNION WU

Available @ all BSP Branches Nationwide!

MONDAY - FRIDAY: 8:45am to 3:00pm

PLUS

Our FX tellers at **Waterfront Place & Vision City Mall** branches in Port Moresby are available 7 days a week:

MONDAY- SATURDAY :	9:45am to 4pm
FRIDAY :	9:45am to 7pm
SUNDAY :	10:45am to 2pm

320 1212 / 7030 1212
servicebsp@bsp.com.pg
www.bsp.com.pg



BSP
www.bsp.com.pg

Susu bilong mama i nambawan long bebi

OL MAMA long dispela kantri i mas givim susu bilong ol long bebi, olsem nambawan kaikai long strongim bodi na stopim sik.

Dispela em strongpela toktok i bin kamap long las wik taim Helt Dipatmen i lonsim PNG Nesenal Helt Wik i bin stat long dispela wik Mande na bai pinis long tomora, Fraide Ogas 23.

Helt Sekreteri, Pascoe Kase, i tok bikpela tingting bilong Nesenal Helt Wik em i toktok long dispela, na em i autim bikpela tok tenkyu long midia long kisim ol toktok na skul awenes long ol helt isu i go aut, long pipel, komyuniti na kantri.

Na em i tok ol nius lain i save mekim bikpela wok long autim toksave i go long ol pablik, na dispela em i gutpela samting tru. Midia i stap yet olsem strongpela patna insait long kamapim nesen na Helt Sekta i amamas, long wanem wok ol midia lain i save mekim wantaim ol gutpela stori na bringim aut ol wok bilong helt sekta i kamap klia long ol niuspepa na ol redio na TV.

Minista bilong Helt, Michael Malabag i tok, long Papua Niugini, i no planti mama nau i save givim susu bilong ol long bebi bilong ol. Planti i no save bihainim gutpela pasin bilong givim susu bilong mama long bebi insait long 6-pela mun taim bebi i bon.

Ating ol i save givim botol na susu bilong mama wantaim na tu givim kaikai wantaim susu taim ol i liklik tumas yet.

Minista Malabag i tok i mas gat moa toksave na bai 60 pesen o moa ol mama bai stat long givim susu long bebi.

"Yumi no laikim ol pikinini bilong yumi bai bun nating o i no gro gut long sais. Na yumi no laikim ol pikinini bilong yumi i dai bipo long ol i kisim 5 yia bilong ol bikos ol i no kisim gut susu na gutpela



Yangpela mama Anna bilong Taurama Rot, I amamas long givim susu bilong em long bebi bilong em. *Poto: Frieda Kana*

kaikai," Mista Malabag i tok.

Papua Niugini i gat bikpela namba bilong bebi i save dai long taim bilong karim na bipo long ol i kisim yia 5.

Namba wan we tru bilong daunim dispela hevi em long ol mama i mas givim tasol susu bilong mama long bebi long taim mama i karim i nap tupela yia moa na i ken bihainim laik bilong pikinini. "Ol pren, namba 5 PNG helt wik i bringim yumi i kam bung wantaim get long glasim moa dispela samting na yumi wanwan i mas stori moa long em insait long ol haus bilong yumi, wok ples na long ol haus sik bilong yumi.

"Mi tokaut pinis long olgeta haus sik na ol helt opis olsem long 19 i go 23 Ogas, olgeta helt lain i mas opim dua bilong ol long komyuniti ol i save helpim long wokim ol medikal sekap, toktok bilong gutpela helt, banis sut na toktok long mama i mas givim susu bilong em tasol long bebi," Mista Malabag i tok.

Long wankain taim, Mista Kase i tok, "Toktok bilong helt em i wok bilong olgeta lain. Olgeta wanwan korporet orgenaisesen, ol pablik insti-

tusen na gavman long kain kain level olgeta i mas wanbel. Sapos yumi i no tingting gut long helt bilong ol pipel long wok ples bilong ol, bai yumi bungim bikpela moa hevi taim ol i painim sik na bagarap."

Sialum pipel i laik kamapim tupela LLGC

OL Sialum pipel long Morobe provins i laikim tupela lokal level gavman kaunsel eria (LLG)we i ken mekim wok long kisim gut sevis i go long ol pipel.

Olsem na ol i askim Deputi Prais Minista, Leo Dion na tu, minista i lukautim ol Provinsel na LLG Afeas na Sialum LLG kaunsel long givim ol tok orait long bruk i go long tupela LLG Kaunsel (LLGC) eria bipo long LLGC ileksen.

Sialum Wod Kaunsela, Teddy Moses, i tok minista i mas lukluk long Morobe Provinsel Baundris Komis Riviu Komiti ripot memba Aune Lotto i bin mekim

nius Nupela kar bai helpim gut ol Lae polis

Bustin Anzu i raitim

LONG nambawan taim, Lae polis i kisim helpim long opis bilong gavana bilong Morobe Provins long las wik.

Na planti moa bai kam long stretim hevi long lo na oda insait long Lae Siti, na provins.

Gavana Kelly Naru i prisenim 6-pela kar long Lae siti polis na tok long kisim ol nupela risev polis insait long siti long helpim namba bilong ol polis.

Mista Naru i tok namba bilong polis insait long Lae Siti i sot na ol i wok long lukim planti hevi i kamap insait long siti.

Na planti manmeri na bisnis komyuniti insait long siti i no pilim seif long stap.

"Planti hevi i kamap long ai bilong mipela na mipela i no mekim sampela samting long wanem, namba bilong ol polis i no inap long stopim o daunim dispela ol hevi.

"Olsem na mipela i lukim planti hevi i wok long kamap insait long siti na mipela i mas helpim long daunim dispela," em i mekim dis-

pela toktok long wanpela polis pereid long Eriku Oval.

Dispela 6-pela kar em bihainim wanpela sabmisen we polis i bin wokim na givim long Morobe Tutumang long las yia.

Insait long dispela sabmisen, ol i bin askim long kisim 60 nupela risev polis, kar, yunifom, gan na katres, na trening bilong ol risev polis.

Mista Naru i tok bihain long ol dispela kar, em bai baim gan na katres bilong polis long givim ol strong.

Mista Naru i gat tingting long rikrutim o kisim 60 nupela risev polis long 6-pela wod kaunsel eria na ol bai stap long 6-pela polis stesin bilong Lae Siti. Ol bai helpim ol polisman na meri long siti.

Long mekim dispela i kamap tru, em i kisim ol kar pinis na nau bai lukluk long ol gan na yunifom na ol narapela samting bilong wok.

"Dispela ol risev polis bai givim sapot long ol polis lain we nau i wok i stap.

Em i no wanpela nupelal samting tasol i gat ol risev

long narapela lain i stap pinis, na dispela em long givim sapot tasol.

"Bikpela samting em long helpim ol polisman long stap long olgeta hap bilong siti." Mista Naru i tok.

Long wankain taim, big bos bilong polis long Lae, Superintenden Iven Lakatani, i tok tenkyu long Mista Naru long bikpela luksave em i givim wantaim ol dispela kar.

Em i tok kain helpim i no kam long polis long opis bilong gavana i kam inap long dispela gavana.

"Mi gat bikpela amamas long Gavana Naru long luksave long hevi bilong polis insait long siti.

Kar em wanpela hevi we ol i gat long longpela taim na nau ol i gat kar, ol bai traim long was long ol ples na hariap long kamap long ples bilong hevi," Mista Lakatani i tok bihain long kisim ki bilong ol Len krusa.

Mista Lakatani i tokim ol man meri olsem ol bai kamap ai na ia bilong em long ripot long ol paul pasin bilong yusim kar bilong wok.

TOKSAVE!

Word Publishing Company, papa bilong Wantok Niuspepa bai pasim opis long Fraide Ogas 30, 2013.

Mipela bai i gat wanpela Inhaus Woksop na trening long ol wokmanmeri long dispela de.

Opis bai op gen long Mande Septemba 2, 2013.

Mipela i tok sori long ol kastoma na ol bisnis klaient bilong mipela long dispela de. - Edita

Colgate

ASKIM DENTIST



Yu gat askim long tit bilong yu?

Plis ringim "Askim Dentist bilong mipla"

Fri long 7303 2288 tasol

(Em fri long Digicel lain tasol. Ol narapela lain baiyu baim.)

namel long 9am na 5pm Mande i go lo Fraide inap long 30 Septemba, 2013

Bogenvil maining lo bai helpim ol papagraun

SAPOS Otonomes Bogenvil Gavman (ABG) i kamapim maining polisi o lo bilong em, ol papagraun stret bai kamap papa long ol samting i stap antap long graun bilong ol na tu, 6-pela fit aninit na i go olgeta.

Vais Presiden bilong ABG, Patrick Nisiria i bin tok long wanpela seremoni i bin kamap long Panguna i no longpela taim i go pinis long kamapim sekan na bel isi pasin long ol grup i bin gat kros namel long wanpela arapela bihainim Bogenvil pait.

Insait long tupela mun i go pinis, ABG i wok long holim ol forum o bung long ol wan wan rijen bilong em olsem long saut, sentrel na not Bogenvil long kisim tingting bilong ol pipel long ol toktok bilong opim bek Panguna Main na

bihain taim bilong em, na ol narapela samting moa.

Las bung bai kamap long Panguna sampela taim long dispela mun.

Mista Nisiria i bin tok ABG i klostu pinisim maining loa bilong em "bai givim rait long ol papagraun stret husat bai kamap papa ol samting i stap long graun bilong ol long antap na 6-pela fit aninit i go daun olgeta."

Long bekim ol toktok bilong Thomas Tari em Presiden bilong Veterans Asosiesen bilong Saut Bogenvil husat i tok ABG i no wokim samting long kisim Bogenvil i go het, Mista Nisiria i bin tok ABG i wokim planti samting long 2005 yet taim em i kirapim wok, tasol em no karimaut ol skul awenes long ol dispela samting.

Digicel opim dabol klasrum long Red Top

Sape Metta i raitim

AMAMAS i bin kilim stret planti ol manmeri na ol pikinini bilong Kiosa, Red Top na Furiri hauslain komyuniti long Lufa distrik, Isten Hailans long wik i go pinis long taim eria menesa bilong Digice, Shent Kiddie, i bin kamap na opim nupela dabol klasrum em Digicel Faundesen i bin sanapim na givim i go long Red Top elementri skul.

Dabol klasrum em ol i wokim long ain na i ken stap moa long 50yia.

Sola penel tu em ol i fitim long givim lait insait long klasrum.

Na i no dispela tasol, Faundesen i donetim tu wanpela tuffa tenk na tupela toilet bilong skul pikinini.

Isten Hailans Sinia Stendets opisa (edukesen) bilong ol elementri skul, Charlie Kavavina, i tok amamas long Digicel Faundesen na tokim ol tisa lukautim gut dispela skul em faundesen i givim.

Digicel eria menesa Shent Kiddie i tok, namba bilong ol dabol klasrum Digicel Faundesen i donetim i go long ol element skuls em 69, na narapela 58 klasrum em Faundesen i wokim na givim i go long ol praimer skul insait long kantri.



Yumi Stori
long
PNG LNG

with Peter Graham,
Managing Director,
Esso Highlands Limited

A few weeks ago the Enterprise Centre launched its inaugural Leadership Awards for SMEs (small and medium enterprises) in Papua New Guinea. I had the privilege of attending this event where I also launched the third edition of the *Enterprise Centre Assessment Magazine*, which profiles 64 businesses evaluated and assessed by the Enterprise Centre.

The PNG LNG Project is tremendously proud of its involvement in the Enterprise Centre. We established the Centre over three years ago in an effort to grow the capacity of PNG businesses and in particular, landowner companies (lancos) so they could participate in the Project by supplying labour, materials, and services. The Enterprise Centre is a core component of our National Content plan. Our PNG LNG Project National Content plan encompasses three pillars: Workforce Development, Supplier Development and Strategic Community Investments. Supplier Development is the focus of my column today.

When we first set out our plan for the Enterprise Centre, we couldn't have imagined the success it would achieve. Along with assisting more than 15,200 entrepreneurs and providing 8300 training days, the Centre has allocated 1200 advisory and mentoring days for PNG businesses. Through delivery of many training courses and evaluation of 270 PNG businesses, the Centre has helped build local business capacity. It has also facilitated efficient communication with PNG LNG contractors, sub-contractors and the Project, and provided support and guidance on access to finance.

The Enterprise Centre is a very important part of the investment we've made in developing the capacity of PNG businesses, including lancos, so that they can develop into long-term sustainable businesses that support the PNG LNG Project or other businesses.

History suggests that many SMEs fail early on, lacking a robust business plan and cashflow to start and sustain operations and lacking the basic business processes needed to run a business. The PNG LNG Project has some great success stories but sadly a few failures. What makes for a successful enterprise varies, but there are some common factors: strong leadership, a realistic business plan, good governance, disciplined business processes and a willingness to learn and to re-invest in building own capacity. We have endeavoured to help in each of these areas.

The PNG LNG Project made a real commitment to buying local goods and services where the quantity and quality meet our requirements and where pricing is generally competitive. We've spent a significant amount of money through procurement of local goods and services - 8.2 billion Kina spent so far in PNG, with 1.7 billion Kina spent with landowner companies alone. I understand there are some who would say we should do more and we continue to challenge ourselves as we make procurement decisions.

The government's ambitious objective of promoting the establishment of SMEs is an exciting development for Papua New Guinean companies. How this is achieved will be important to both suppliers and consumers of products and services in PNG. While selectively reserving certain business lines for Papua New Guinean SMEs may be sound strategy, a broad-based reservation may risk the viability of the consumers, particularly large-scale project developments. A risk is that the capacity to meet contractual commitments will not exist, or not be available efficiently and projects will be delayed, and cost of doing business will increase. It will be important to find a balance and to understand what it takes for businesses to be ready and to be competitive and to work those challenges proactively.

As the government moves to stimulate the SME sector, we hope that others will step up and support the Enterprise Centre and other initiatives that aim to help build capacity in Papua New Guinean companies.

I'm interested in your feedback, and if there is anything you'd like to read in this column. We'll try to get around to all the requests, so please send us an email at pnglngproject@exxonmobil.com.

Gutpela de.

BEYOND BOUNDARIES
SUNDAY, 6PM - 6.30PM

Topic of the week:

National Disaster Policy



FM100

PNG's Information & Music Leader

Text 1610


ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAU 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAQIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAUBULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Gavman no ken tekova long OTML

Stanley Nondol i raitim

PAPAGRAUN bilong Ok Tedi Mining Limited (OTML) i no laikim gavman i tekova long wok maining tasol i laikim gavman long kamap patna na givim sevis long ol pipel long Westen. Ol papagraun i tok ol les pinis long arim tok politiks bilong gavman. Ol tok ol i no kisim sevis bilong gavman moa long 30 yia na tok ol i no laikim gavman long go insait long graun bilong ol na tekova long menesmen bilong main. Las wik long Aiambak long Midel Fly, ol papagraun i tokim, Westen gavana Ati Wobiro long toksave go long Praim Minista Peter O'Neill olsem ol no laikim gavman tekova long OTML. Ol papgraun i autim belwari olsem gavman i kisim bikpela milien kina taim main i stat long 1982 tasol i no lukluk bek long stretim besik sevis. Ol i singaut long gavman long go lukim ol ples i bagarap na putim mani na wok patna wanataim OTML, Fly Provinsel gavman na papgraun long stretim ol besik sevis olsem rot, helt na rot. Ol papagraun i mekim dispela tokotk bihain long Praim Minista Peter O'Neill i go long Tabubil tupelo wik i go pinis na tokaut long ol wokman bilong OTML long gavman bai lukautim menesmen bilong OTML. Ol papagraun i autim belhat na tok, gavman i kisim bikpela mani long OTML tasol ol i no lukim hanman bilong gavman long 30 yia. Ol tok ol lukim OTML olsem gavman long stretim rot, bris, skul na haus sik. Praim minister Peter O'Neill bin tokaut long gavman bai kisim menesmen bilong

PNGSDP na i tok olsem gavman bai tekova long menesmen bilong PNGSDP tasol olgeta wokman bilong main bai stap yet long wok. Mista O'Neill i tok PNGSDP i mekim gut tasol i gat planti samting em i no lukluk. Praim Ministeri i tok taim gavman tekova, PNGSDP fan bilong OTML bai go long givim sevis long ol pipel bilong Westen Provins tasol. PNGSDP i gat moa long K3 biliEn stap long Tras Akaun na dispela mani stap long akuan long benk long Singapore . OTML nau operetim tupela andagraun maining na wanpela open pit main bilong kopa, silva na gol. OTML main laip inap long pinis long 2013 tasol menesmen na papagraun na gavman wanbel long surukim wok main go het. Aninit long dispela i lukim OTML na papagraun i kamapim CMCA long putim 6.2 pesen bilong winmani long mekim wok developmen. Dispela winmani em OK Tedi Developmen Faundes i menesim na lukim planti wok kamap long rot, helt , edukesen na bris long givim sevis long ol pipel long Westen. Westen provins em wanpela Afrika long PNG we kain kain sik i save bagarapim ol pipel na planti dai. No gat rot, helt sevis, skul, gutpela maket na mekim laip bilong ol pipel go hat olgeta. Ol pipel save kisim balus na bot long go long Kiunga na Tabubil long kisim gavman sevis. Dispela em i dia tumas long ples manmeri.. Planti ol viles lida na ol mama krai yet long gutpela rot long go hariap long gavman stesen long kisim sevis.



Mep bilong ples long OK Tedi main eria

Wok redi bilong PM i go long Goroka

Sape Metta i raitim

OGAS 27 em i wanpela bikpela de bilong ol pipel bilong Goroka na Isten Hailans.Praim Minista Peter O'Neill wantaim klostu long ol geta memba bilong palamen na ol opisel delegesen bai pulim lain i go antap na kukim dispela provinsel kapitel long taim ol i sindaun na lotu long Nesenel De Pak. Nau yet, ogenaizing komiti i wok hat long stretim gut ples na ol samting long kisim Mista O'Neill na delegesen bilong em. Ogenaizing komiti siaman na eking provinsel edministresen Bill Kavanamur i tok, taim i wok long suruk i kam klostu na em i amamas olsem ol opisa bilong em long wanwan divisen long provins i wok long mekim gutpela wok long redim ples na ol samting long Goroka taun. Em i tok, wok i kamap gut na tupela bikpela samting we bai i ken givim sampela problem o hevi em wara na pawa saplai bilong taun. Mista Kavanamur i askim Goroka Eben Lokel Levol Gavman na PNG Pawa long noken pasim wara saplai na kamapim pawa blek aut long taim praim minista na ol visita i kam long taun. Em i tok, long sait bilong sekuriti, polis na CIS bai wokabaut long lukautim taun. Mista Kavanamur i tok, wokabaut bilong praim minista, ol lidaman-meri na ol visita em i bikpela samting long ol pipol bilong Goroka na Isten Hailans. Olsem na em i askim olgeta manmeri long provins long stap isi, wokbung wetim dispela bikpela opisel wokabaut bilong praim minista na delegesen bilong em. Dispela wokabaut bai lukim tu planti ol biknem sios pasta na ol arapela visita husat i redi long pulim lain i kam long ol arapela 6-pela provins long Hailans rigon na Madang na Morobe provins tu.

Nait Naip Eksesais i stat long Wewak

Samting olsem 70 soldia bilong Australia Difens Fos 2 Komando Rejimen (ADF) nau i stap long Wewak, Is Sepik Provins long wokim Nait Naip eksesais wantaim sampela PNGDF soldia. Dispela ekse-sais i stat long Mande 19 na bai pinis long Septemba 5. Dispela em i bilong makim stat bilong, wanpela ADF/PNGDF eksesais bilong ol tupela kantri bilong strongim ol soldia bilong ADF na PNGDF long pasin bilong wok bung wantaim. Nait Naip eksesais em i wanpela wok bung bilong Australia na PNG Difens Fos, we ol soldia bai kalap long helikopta na parasut i go daun long solwara na bus wantaim. Bai i gat ol kos insait long dispela trening we ADF na PNGDF i givim long soim wanem save tupela fos i gat long en. Eksesais Nait Naip bai i kamap long sampela hap bilong Is Sepk Provins, na bihain bai wanpela hap bilong ol ADF i go long Nadzab, Morobe Provins long kalap moa long parasut long Septemba 4. Dispela kalap long parasut

long Nadzab em i bikpela samting tru long ADF, bilong wanem em bai kamap long hap stret long bipo taim Australia i bin mekim namba wan taim kalap long parasut long Nadzab, long taim bilong Wol Wo 2 long 1943. Bai i gat ol yunit bilong PNGDF i wokim dispela Nait Naip eksesais na ol i kam long 2RPIR long Moem, Long Rens Rekonesens Yunit, ATW (Air Transport Wing) na ol arapela ol yunt long olgeta hap bilong PNGDF. Long eksesais bai ol i yusim ol Bel 202 helikopta we ol i kisim long lis i kam long Australia Difens Koporesen Program wantaim PNGDF. Hetman bilong Australia Difens Staff, Colonel Dick Parker i tok, "Ol kain eksesais olsem Nait Naip i soim komitmen bilong Australia long helpim PNGDF long kamap gut moa long wok bilong ol. "Em i givim sans long ol ADF memba tu long lainim sampela stail samting long ol wanwok bilong ol long PNGDF long strongim yet wok bung bilong ol."



Parasut bilong Australia Difens Fos.

Ol sios lida i bel hevī long Praim Minista

PNG KRISTEN Lidas Alaiens (PNGCLA) na PNG Kaunsel ov Sios (PNGCC) i autim bel hevī bilong ol long Praim Minista Peter O'Neill long hevī bilong ol Asailum Sika insait long wanpela nius konprens long dispela wik.

Ol sios i gat bikpela wari long wanem, Praim Minista na kabinet bilong em i no kisim advais bilong sios lida long sainim agrimen wantaim Praim Minista bilong Australia, na tu, long oraitim lo bilong det penelti.

Insait long midia konfrens long Tunde long dispela wik, ol hetman bilong ol sios i tokaut long tingting sios i gat long sampela bikpela samting Praim Minista i mekim long gavman.

Pater Danny Bray Guka, siaman bilong PNGCC i tokaut olsem gavman i luksave long PNGCC na PNGCLA olsem tupela ekumenikal bodi i stap, olsem na i gutpela sapos gavman i ken askim tingting bilong ol pastaim long mekim senis long lo o sainim agrimen olsem bilong ol Asailum Sikas na det penelti.

"Sios i luksave long wok bilong gavman na long taim nupela gavman i bin kamap, mipela givim taim long dediketim long God bihain long ileksen olsem na nau dispela Manus dil em i mekim sios i kirap nogut," Pater Danny Guka i tok.

"Mipela save long namba wan agrimen we Gren Sif Se Michael Somare i bin sainim wantaim Praim Minista Howard bilong Australia, em long Manus bai stap olsem ples bilong sekim ol asailum sika na bihain salim ol i go long narapela kantri. Nau mipela kirap nogut olsem taim nupela Praim Minista bilong Australia i kisim gavman, em i no westim taim long kam long PNG long wok bilong sapotim Polis Fos, na Praim Minista bilong PNG i bihainim em isi tasol na tupela sainim dil long hap," Pater Guka i tok.

Mipela lukim long nius olsem planti pipel i no amamas long ol dispela pasin gavman i mekim. I gat planti bagarap i ken kamap long ol pipel. Sios i wet long gavman i mas kisim tingting bilong em pastaim long mekim ol bikpela disisen i bringim senis long sindaun bilong ol pipel, bikos sios em i maus bilong God.

Mipela luksave long bikpela mani gavman bilong Australia i promis long givim long PNG aninit long dispela agrimen. Em i gutpela, tasol mipela i lukim olsem ol i wok long subim i go daun long nek bilong yumi. Ol sios i gat wok long lukautim ol pipel em wankain tasol long gavman, tasol sios i save go sanapim haus lotu na i stap wantaim ol pipel. Gavman i save go mekim wok projek na i save lusim long taim mani bilong projek i pinis, olsem na gavman i mas harim mipela," Pater Guka i tok.

Long wankain taim tu, Siaman bi-



Ol sios lida long nius konfrens.

long PNG CLA, na hetman bilong Katolik sios long Pot Mosbi Daiosis, Asbisop John Ribat i tok long ol Asailum sika olsem ol i lusim ples bilong ol long painim gutpela sindaun we i no gat hevī long en na olsem na ol i tingting long Australia. Tasol nupela senis long Australia gavman i hukim PNG long namel nau.

Ol pipel bilong Manus i tokaut pinis long nius olsem ol i wari long Kristen laip bilong ol, wok bilong ol na sefti bilong ol. Em i gutpela long gavman i mas harim tok bilong ol Manus.

"Mipela givim ful sapot long Praim Minista na long olgeta gutpela wok em i wokim nau long kantri tasol sampela taim em i mas kisim tingting bilong ol pipel pastaim. Dispela Manus dil i gat tu bel tingting long ol pipel. Ol benefit i kam i mas go long ol Manus pastaim na bihain tingim ol narapela hap olsem, UNITECH na Angau Haus Sik long Lae.

Narapela sios lida em i makim ol pentekostal sios, Pasto Daniel Hewali i tok PNG i gat 98 pesen Kristen na tu em i sainim tok promis o kavanen wantaim Israel long mekim God bilong Israel i kamap God bilong PNG. Na taim gavman i mekim dispela kavanen, bihainim tok bilong God, dispela em i save gat bekim bilong em.

Sapos kantri i bihainim tok bilong God bai em i lukim gutpela samting i kamap, tasol sapos em i no bihainim laik bilong God, kantri i ken kisim bikpela bagarap.

"Mi givim bikpela luksave long Praim Minista, olsem yu mekim gutpela wok, tasol bilong wanem na yu go long Australia na sainim agrimen bilong Asailum sika. "Dispela ol pipel

yu bringim i kam insait long kantri, em ol i save kilim man long holim bilip bilong ol. Dispela kantri em i gat bikpela blesing wantaim ol risoses na ol dispela lain nogut bai kamap birua long yumi," Pastor Hewali i tok.

Modereta bilong Yunaitet Sios, Rait Rev. Bernard Siai i tok, "Mipela laik tokim gavman olsem ol sios i pre long yu. Long baibel gavman i save wok wantaim sios. King long olpela testamen i save kisim tingting bilong profet na bihain em i save mekim samting. PNG em i Kristen kantri

olsem na olgeta samting yumi mekim em i mas bihainim tok bilong God. Mipela tokaut olsem Jisas em i Bikpela bilong PNG.

Planti pipel i no harim yet dispela nius, tasol long ol lain i harim, planti bilong ol i no wanbel long Asailum sika dil. Mipela lukim olsem Australia wok long pusim ol Asailum Sika long kam long PNG tasol ol i laik go long Australia. Ol i no laik kam long hia," Rev Siai i tok moa.

Pater Guka i tok, "Planti pipel i wok long tok olsem yumi i no inap long

helpim ol narapela lain taim ol pipel bilong yumi yet i no gat ples na stap we yumi no stretim ol yet. Yumi amamas long helpim bilong Australia, tasol yumi mas luksave gut. Nogut basket mani bai pasim ai bilong yumi."

Sios lida nau i tingting long raitim wanpela pas i go long Praim Minista na long ol memba bilong palamen long givim tingting bilong ol bihainim dispela nius konprens na ol i singaut long ol Kristen long pre yet na God bai mekim gutpela samting.

AGRICULTURE TRACTORS

90hp
70hp
50hp

- Slashers
- Disc Ploughs
- Disc Harrows
- Post Hole Augers
- And Other Attachments for Farming

PORT MORESBY: 323 7957 | Digicel: 7215 0333 / 7217 9815
LAE: 472 6324 KOKOPO: 982 8748 | email: machinery@agmark.com.pg

AGMARK MACHINERY

NASFUND FM100 TALKBACK SHOW

MONDAY - FRIDAY, 9AM TO 12PM

Participate and be heard on an open forum on National Radio

FM100

PNC's Information & Music Leader

Studio: 323 3777 or 323 3999

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAU/BULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Kompian kisim nupela mateniti wod

PNG SASTENEBEL Divil-opmen Program i helpim gen wanpela rurel haus sik long kisim nupela wod bilong ol mama i karim pikinini long Kompian, Enga Provins.

Klostu long 77,000 pipel insait long Kompian-Ambum distrik bai kisim helpim long dispela nupela wod long haus sik.

Nupela wod i gat narapela kain stail we ol i wokim long glas na ol mama bai kisim gutpela helpim long taim ol i yusim dispela ples bilong karim.

Enga Baptis Helt Sevis i lukautim dispela haus sik na projek tu. Haus sik long Kompian i no bin gat gutpela haus na long yia 2007 ol i bin askim PNGSDP long helpim ol long wokim hap bilong wanpela tupela stori haus wantaim tupela wod bilong ol sik lain i slip long graun plua na administresen opis long plua antap.

“PNGSDP i amamas long wok poroman wantaim kain ogenaísesen olsem Enga Baptis Helt Sevis bilong wanem ol i gat gutpela stori baksait long ol wok bilong ol,” David Sode, Sif Eksektiv Opisa bilong PNGSDP i tok long taim ol i opim nupela mateniti wod.

“Mi stap long taim bilong opim namba wan projek long 2009, na mi bin kirap nogut long lukim sais na stail bilong haus ol i wokim.

“I no planti taim mipela i save helpim long kamapim 4-pela projek insait long wanpela eria. Tasol mipela i lukim gutpela wok bilong dispela patna, maski ol i stap long hatpela ples tru, mipela helpim gen long sanapim wanpela wod bilong ol sik pikinini, haus kuk, na ol wok bilong pawa long wod bilong ol sik lain na tu long kamapim gutpela administresen opis,” Mista Sode i tok.

Wanpela yia bihain, Kom-

pian haus i ken kisim biknem long dispela 4-pela projek; wanpela nupela mateniti wod wantaim tupela rum bilong karim pikinini wantaim waswas rum na toilet, ples bilong givim win long nupela bebi, na long was long bebi, na 8-pela bet bilong ol mama na bebi i slip bihain long karim.

Dispela projek i kos olsem K665,000 na PNGSDP i putim K250,000, na EBHS na ol arapela lain i putim K364,843. Lokol komyuniti i givim han long wokim haus na sapos ol i kisim pe, em bai kos olsem K50,000.

Haus sik yet i gat skul bilong lainim ol dokta bilong PNG na ovasis tu. I gat tripela residen dokta i stap long lukautim ol siklain, sampela we MAF balus i save kisim I kam long Is Sepik Provinis tu.

Dispela haus sik em i wanpela haus sik we ol sik lain long ol bus ples i save kam wantaim.



Nupela mateniti wod long Kompian.

Ororo Paimereri Skul i gat nupela laibreri

ORORO Paimereri Skul long June Valley, Nesenal Kepitol Distrik nau i kisim nupela laibreri haus wantaim gutpela helpim bilong BSP Benk Gordons Brens.

Bihain long tripela mun, ol wokman bilong BSP i pinisim wok long stretim olupela klasrum long kamapim wanpela naispela laibreri haus bilong ol sumatin na i givim long ol las wik.

Dispela Paimereri Skul i stap long wanpela hap nogut bilong ol raskol na stilman, tasol BSP i makim dispela ples long wokim komyuniti projek.

Insait long projek, ol woklain bilong BSP i stretim wanpela klasrum em i bin bagarap pinis, tasol nau ol i senisim na i kamap laibreri. Ol penim gen haus, senisim siling, putim nupela pawa waia, nupela lait na nupela ea kondisen yunit long laibreri.

Skul i amamas tru na i stat long yusim laibreri pinis long Nesenal Buk Wik, taim opisel opening i no kamap yet.

“BSP bai i no ken givim sevis bilong beng tasol, nogat. Mipela i gat bikpela laik long mekim senis insait long komyuniti wantaim gutpela projek bilong kirapim nesen,” Mis Wanu, BSP Gordons Brens Menesa i tok.

Prinsipel bilong Ororo Paimereri skul, John Baya i tok tenkyu long ol BSP woklain na i apim nem bilong. Olgeta sumatin wantaim papamama tu i bung na tok tenkyu long ol.

Arapela komyuniti wok bilong BSP Gordons em long stretim kensa wod long Pot Mosbi Jeneral Haus Sik long 2009, nupela basketbol kot long Erima Paimereri Skul long 2010, Stretim Laibreri Haus bilong Gerehu Paimereri Skul long 2011 na ol i givim nupela yunit bilong



Nupela skul laibreri haus.



Ol sumatin amamas long nupela laibreri.

hat klinik long Pot Mosbi Jeneral Haus sik long 2012.

Wan wan brens i gat wok long helpim wanpela projek long komyuniti ol i stap long en. Long dispela yia, ol brens bilong BSP long kantri

i wok long 33 komyuniti projek, we 23 bilong ol i pinis na ol i givim i go long ol komyuniti.

Ol komyuniti wok bilong BSP i save kam olsem long samting bilong helpim skul

na stretim klasrum, stretim haus sik na ed pos, putim wara tang, stretim maket, klinim ol pablik ples na long sapatim ol kain kain wok marimari.



Bebi Philip, i kisim hat operesen, wantaim mama Geneviv.

Kaikai long nupela bebi i ken bagarapim em

“SAPOS yu givim strongpela kaikai o wara long bebi taim ol 4 o 6 mun tasol, em i ken bagarapim helt bilong ol,” James Amini, namba wan dokta bilong pikinini, i tok.

Em i tok olsem ol bebi i mas dring susu bilong mama tasol inap ol i kisim 6 mun.

Dokta Amini wantaim ol narapela saveman bilong Dipatmen bilong Helt na Wol Helt Ogenaísesen i autim dispela tok lukaut olsem givim kaikai long bebi hariap tumas bai bagarapim bebi.

“Ol rop long bel bilong bebi i liklik tumas na i no nap long holim kaikai. Strongpela kaikai i ken brukim ol sait bilong bel rop bilong em. Taim bebi i winim 6 mun orait ol i ken givim kaikai, tasol em i mas dring susu bilong mama inap em i kisim 2 yia o moa,” Dokta Amini i tok.

Em i tok bodi bilong ol bebi i no redi long brukim strongpela kaikai. Ol wok bilong bodi long brukim daun kaikai i no kamap gut yet na em bai bagarapim dispela

sistem sapos ol i kisim kaikai hariap tumas.

Ol i ken kisim bel pen, bel tait na pekpek bai strong na mekim bebi i sik. I gat ol tok lukaut long helt i stap olsem kaikai i ken pasim nek bilong bebi, o kamapim sampela kain skin sigirap na tu i ken kamapim sik suga o bebi bai kamap malnaris na i no save slip gut.

Nutrisenis long Helt Dipatmen, Eileen Nogimap i tok, givim susu bilong mama tasol long bebi i kamapim bikpela hevi, bilong wanem ol mama i laik givim kaikai hariap long ol bebi. Ol 55 bebi insait long 1000 i bon i save dai taim ol i stap aninit long 6 mun, sampela em long hevi bilong stretpela kaikai.

Dokta Amini na Mis Dogimap wantaim ol spesialis bilong Wol Helt Ogenaísesen na Susu Mama i mekim ol toktok bilong susu bilong mama em i gutpela long 6-pela mun bilong bebi long FM100 redio tokbek so long dispela wik.



Yut, Meri na Famili

**Pastor
Barbara Lunge**

Harim tok bai kamapim gutpela sindaun

"MAN i gat gutpela tingting i save harim toktok na kisim moa save; saveman i save harim gutpela tok skul: Na dispela buk bai helpim ol man i gat save na bai ol i kisim save moa yet, na em bai i skulim ol man i gat gutpela tingting long ol gutpela rot ol ken bihainim. Sapos yu laik kisim gutpela save, orait pastaim yu mas aninit long Bikpela. Ol man i no gat gutpela tingting ol i no laik tru long skul na kisim gutpela save". (Gutpela Sindaun 1:5,7)

Yumi wanwan i mas stap wantaim bel isi na wanbel wantaim Bikpela na ol arapela wan lain bilong yumi.

I gat ol ples na lain God yet i redim wantaim ol lo na kastom bilong ol we yumi mas soim rispek na bihainim, long gutpela bilong yumi. Namba tu, ol papamama, namba tri ol opisa bilong gavman olsem ol tisa, ol bos, ol bikpela lain long ples na ol arapela lain i stap lidaman.

Em ol dispela lain i makim maus bilong Bikpela, na yumi mas bihainim tok bilong ol sapos yumi laik sindaun gut wantaim gutpela samting, na stap helti na planti moa gutpela blesing bai bihainim yumi. Hia yumi lukim sampela as tok long baibel long yumi mas harim na bihainim tok na bai yumi lukim ol blesing i kam, sapos yumi no harim tok na bihainim, bai yumi bungim taim nogut.

"Sapos yupela i bihainim tok bilong God, Bikpela bilong yumi, na bihainim gut olgeta lo bilong en nau mi givim long yupela, orait em bai i givim biknem long yupela, na bai yupela i winim olgeta arapela lain pipel long graun. Yupela i mas bihainim tok bilong God, Bikpela bilong yumi, na bai em i givim yupela olgeta dispela gutpela samting." (Lo 28:1,2) God i ken toktok long yumi insait long baibel, o Holi Spirit i ken yusim ol arapela lain, o long ol samting yumi lukim nabaut. Yumi mas bihainim tok bilong Bikpela taim em i toktok long yumi.

"Yupela pikinini, yupela i mas bihainim tok bilong papamama bilong yupela. Yupela olgeta i pas wantaim Bikpela, na dispela pasin em i stretpela pasin bilong yupela i mekim. Lo bilong God i tok olsem, Yu mas aninit long papamama bilong yu na bihainim tok bilong ol. Dispela lo em i namba wan lo i gat promis i stap wantaim, 'Sapos yu mekim olsem, orait olgeta wok samting yu mekim, i ken kamap gutpela, na bai yu stap longpela taim long dispela graun.' Na papa, yupela i no ken bagarapim tingting bilong ol pikinini bilong yupela na mekim ol i belhat. Nogut. Yupela i mas mekim gutpela pasin long ai bilong Bikpela, na streitim gut ol pikinini biong yupela na skulim ol long tok bilong Bikpela.

"Yupela ol wokboi nating, yupela i mas aninit long ol bosman bilong yupela, na yupela i mas pret tru, nogut yupela i mekim pasin i no stret long ai bilong ol. Oltaim yupela i mas tingting strong long mekim gutpela wok tasol, long wankain pasin olsem yupela i save mekim long taim yupela i mekim wok bilong Krai. Na yupela ol bosman, yupela tu i mas mekim gutpela pasin long ol wokboi nating bilong yupela. Yupela i mas lusim pasin bilong pretim ol. Bikpela i stap long haven, em i Bikpela bilong yupela na bilong ol tu, na em i save skelim pasin bilong olgeta manmeri long wankain pasin tasol. (Efesus 6:1-5, 9)

Sapos yu laik save moa; toktok wantaim wokmeri bilong Bikpela, Barbara Lunge, Rivers of Grace Intenesenal Ministri. P.O. Box 3063. Boroko. NCD. Papua New Guinea. B Mob 67331426/71075829 DG.

Ol meri Raikos kisim salens long groim moa rais

James Kila i raitim

FUD Krop na Egrikalsa Edvaisa wantaim Madang Provinsal Edministresen, Mary Lilih i givim bikpela salens tru long ol meri long Raikos long kamapim moa lokal rais long kaikai wantaim famili bilong ol.

Misis Lilih i tok ol meri i no ken tingting long baim tasol rais bilong stua.

Em i tokaut olsem planti ol famili long PNG tude i save laik baim rais blong ovasis na i lus tingting stret olsem ol yet i ken groim moa rais long fidim famili bilong ol.

Em i bin givim dispela strongpela salens long Basamuk, i no long taim i go pinis taim em i mekim wanpela awenes raun bilong em long lokal rais prodaksen.

Dispela awenes i go wantaim visen o lukluk i go pas bilong gavman long strongim fud sekuriti insait long kantri.

Misis Lilih i bin mekim dispela awenes raun bilong em wantaim Laipstok edvaisa Joe Naram na tu ol Egrikalsa opisa bilong Ramu NiCo Menesmen (MCC) Limited, aninit long Pablik-Praivet Patnasip Program (PPP).



Madang Fud Krop Edvaisa, Mary Lilih i salensim wanpela mama long groim moa lokal rais. Foto: James Kila

Em i tokim moa long 30 wimen fama olsem i gat ol fama long Madang husat i soim olsem ol i ken groim rais na kaikai wantaim famili oltaim

na tu ol i save salim rais na kisim mani.

Misis Lilih i tokaut tu olsem olgeta yia PNG i save lusim olsem K600 milien long baim

rais i kam long ovasis.

"Sapos yumi yet i ken groim rais blong mipela na stopim dispela pasin bilong baim rais long ovasis, yumi bai sevim mani na yusim mani long ol arapela wok bilong yumi long ples," Misis Lilih i tok.

Ol meri na ol mama husat i bin stap harim aweanes toktok i tokaut stret olsem ol i save lusim bikpela mani long salim arapela gaden kaikai na buai long baim rais long Madang taun. Sampela mama i tokaut tu olsem ol i save kaikai rais long moning na apinun wantaim na rais ya em ol i baim long stua.

Ol meri long Basamuk i stori olsem ol i save kisim bot i go kam long Madang na peim bot fi olsem na baim rais beg long Madang na peim freit o pei bilong kago em i kam bek wantaim sampela liklik kaikai bilong strongim bel, em kos K150 olgeta long wan wan de.

Misis Lilih i tokim ol meri Raikos olsem ol i laik baim beg rais tasol, em i kos olsem K167 long go kam long Madang taun.

Tasol sapos ol meri i groim rais bilong ol yet long ples ol i ken sevim dispela mani na kamapim ol arapela gutpela wok long en.

Amerika bisnis meri i kam long PNG

EMBESI bilong Amerika long PNG, i kisim wanpela meri bilong Amerika, Samira Cook-Gaines, meri i gat moa save long kamapim bisnis long lon-sim ol toktok bilong Wimen Empawamen Spika stat long Ogas 18 i go 24.

Misis Cook-Gaines bai tokaut moa olsem ol meri i wokim bisnis em i bikpela samting tru long helpim ikonomi developmen bilong kantri. Em bai go pas long mekim ol toktok bilong senisim tingting na woksap bilong soim stail bilong bisnis na save long ronim fainens na long ol meri ronim bisnis na ol meri long infomol sekta.

Wokabaut bilong Samira bai i soim sampela wok wantaim ol sumatin bilong Pasifik Adventis Yunivesiti we em bai



Misis Samira Cook-Gaines..

strongim ol sumatin long bihainim tingting bilong kamap bisnis manmeri. Em bai autim toktok bilong kirapim tingting bilong ol wok meri long wanem kain we ol i ken winim ol salens i kamap long wok ples

na ol meri long Haus Ruth long we ol i ken strongim bilip bilong ol long wok bilong fainens.

Raun bilong Samira em i hap bilong tingting bilong Amerika long givim moa skul long ol meri long Papua Niugini long kamap strong insait long wok bilong ol. Amerika Dipatmen bilong Stet opis bilong Intanesenal Infomesen Program (IIP) Spika Program i sponsa long wokabaut bilong em.

Samira em i Vais Presiden bilong Bisnis Developmen bilong Nesenal Komyuniti Ri-invesmen Koalisen (NCR). Em i lida bilong 4-pela bisnis developmen senta; The Washington, DC Women Bisnis Senta (DC WBC) long Wash-

ington DC, Manhattan na New York, na wanpela liklik Bisnis Senta.

Em i namba wan dairekta bilong 'The Washington, DC Wimen Bisnis Senta, husat i save sapotim ol bisnis meri long trening, toktok wantaim wan wan meri, lainim wok na groim bisnis wantaim pasin bilong gavman long baim ol samting na salim i go ovasis. Long taim bilong Samira olsem dairekta, DC WBC i helpim pinis 1000 meri long kamapim ol bisnis gol bilong ol.

Long givim luksave long wok bilong em long helpim ol liklik bisnis lain, Amerika gavman i bin makim Samira olsem wanpela Wait Haus Sempien bilong senis long sait bilong lainim ol narapela long wok bisnis.

Givim susu bilong mama long bebi i gutpela tru

SUSU MAMA, i skulim ol mama long long Pot Mosbi, long givim susu bilong ol yet long ol bebi.

Ol i wokim dispela long sapotim bikpela tok bilong nesenal helt wik olsem bebi i mas dring 'susu bilong mama tasol'. Helt wik i bin stat long 19 Ogas na bai pinis long 23 Ogas.

Sista Lillian Gadebo bilong Susu Mama i tok, em i gut-



Sista Lillian Gadebo

pela taim tu bilong ol long tokaut long wanem wok bilong Susu Mama insait long kantri.

Ol i skulim ol lain long ol gutpela samting bai kamap long bebi taim mama i givim em susu bilong em tasol, Kolostram, bebi bai slip olsem wanem na dring susu, na sampela sik i save kamap long susu, bengim susu long kap na givim bebi, na sik

malnutrisen, HIV na susu bilong mama.

"Olgeta lain i mas save gut na bihain ol i ken wokim wanem samting ol i laikim long kamapim helti nesen," Sista Lillian i tok.

Susu Mama long arapela hap olsem Lae, Goroka na Hagen tu bai wokim wankain samting long strongim tingting bilong provinsal helt dipatmen na long kantri tu.

Maopa amamasim 127 yia bilong Yunaited sios

Nicky Bernard i raitim

MAOPA em wanpela long ol liklik ples insait long Aroma long Sentral Provins, dispela liklik ples i save bihainim Yunaited Sios bilong ol I kam inap nau.

Long wik i go pinis ol i amamasim 127 yia we Yunaited Sios bin kamap long liklik ples bilong ol na bin senis laip bilong ol.

Maopa ples i gat wanpela haus lotu we i liklik na olupela tru, planti bilong ol manmeri na pikinini husat save go lotu i save sindaun ausait na harim tok bilong God. Planti bilong ol

lapun tu i no save go lotu long wanem haus lotu i liklik.

Long taim bilong amamasim dispela 127 yia bilong Yunaited Sios long ples bilong ol, ol kamapim wanpela fan resing bilong kamapim nupela na bikpela haus lotu bilong ol we i ken kisim planti manmeri na ol lapun tu.

Ol Pasto na lida bilong ples i raitim wanpela askim leta i go long memba bilong ol Sir Puka Temu long askim em long helpim long mekim dispela fan-rasing long kamap nupela haus lotu. Dispela i mekim tingting bilong memba bilong ol long helpim.

Sir Puka, i salim wanpela askim leta tu i go long Praim Minista Peter O'Neil na ol Sentral memba bilong palamen long kam long ples Maopa long amamasim dispela 127 yia bilong sios, na tu mekim liklik fan easing long helpim kirap dispela nupela haus lotu.

Dispela wari na kra i bilong ol ples lain long Maopa long nupela haus lotu i karim kaikai. Praim Minista i putim sampela mani long kik statim wok bilong nupela haus lotu. Ol memba bilong Sentral provins olsem, Ano Pala, Daniel Mona, Sir Puka Temu na gavana bilong ol yet,

Kila Haoda, i bin putim tu sampela mani long long dispela haus lotu.

Praim Minista tu i no lus ting long ol narapela liklik sios long ples Maopa. Em givim liklik helpim long mekim liklik wok long haus lotu bilong ol.

Dispela liklik ples bai gat nupela stail haus lotu we bai inapim olgeta lotu lain bilong ol na tu ol bai mekim ples bilong ol lapun husat i stap long wil sia bai ken go lotu tu.

Wok kirap bilong dispela nupela haus lotu bai stat nau na bai pinis long yia i kam wantaim opening bilong em.



SELEBRET: Ol sios mama grup bilong Maopa yet i putim ol naispela waitpela klos na bilas, na sanap redi long singsing olsem hap long 127 yia bilong sios selebresen.



WELKAM: Wanpela pasto bilong Yunaited Sios long Maopa i welkamim Praim Minista, Peter O'Neill long kamap na stap wantaim ol long amamasim 127 yia bilong sios long ples bilong ol. **Ol poto: Nicky Bernard**

Ritrit progrem skulim ol pikinini

MOA long 30 skul mangi brukim lewa bilong ol papamama taim ol pinisim tripela de ritrit bilong ol long Jubilee Katolik Sekenderi Skul long Mosbi las wik Sande.

Dispela ritrit em wanpela skul progrem aninit long lotu progrem bilong em long stiaim ol pikinini long kisim gutpela na stretpela tingting long laip bilong ol. Na long lukluk long wanem gutpela pasin ol ken mekim long kamap gutpela manmeri long taim bihain.

Gret 11 klas bin statim dispela ritrit long Fraide we ol lusim haus wan wan na go slip long skul aninit long lukaut na kontro bilong ol tisa kodineta bilong ritrit we ol lainim pasin bilong lotu na skelim tingting bilong ol go kam. Na tu ol lainim long wanem kain pasin ol mas kamapim na strongim long stiaim ol long taim bihain bilong ol.

Prinsipol bilong skul Misis Benedette Ove i tokaut bihain long Sande lotu olsem dispela progrem em ol save holim olgeta yia long skul wantaim ol gret 11 long redim ol long go insait long gret 12 na bihain tu long wanem bikpela skul o hap ol go long en.

Misis Ove i tok progrem bin



PAINIM WANPELA ARAPELA: Wanpela long ol ektiviti ol sumatin i bin mekim long ritrit program bilong ol em long banisim ai na wokabout painim ol poro bilong ol.

helpim tru planti sumatin pinis na ol save amamas tru long kam bek long olgeta yia long helpim ol liklik husat kam bihain long dispela progrem.

Misis Ove i tok dispela ritrit progrem i save helpim tru ol skul pikinini long sapim tingting bilong ol na eksen bilong ol tu i save bihainim wanem gutpela tingting ol i kamapim.

Planti taim ol pikinini i no save tokaut stret long ol papamama long wanem samting ol i gat long tingting bilong ol. Ol save tingim tasol na holim stap olsem na dispela progrem em gutpela long bungim ol wan-

taim na ol ken tokaut na skelim tingting wantaim ol wanlain bilong ol. Aninit long lukaut na was bilong ol tisa na kodineta.

Ol papamama bin go kamap long Sande moning long skul graun long kisim ol wantaim ol kaikai na ol flawa. Taim ol skul mangi i kamaut long bungim papamama, dispela i kamap narakain olgeta we i brukim bel bilong ol papamama long kain senis ol pikinini bilong ol go insait long en.

Insait long dispela progrem tu ol pikinini i raitim pas long papa o mama bilong ol na tokaut tru long wanem kain bel


na tingting em gat. Ol bin autim tru laikim na lewa bilong ol stret long papa o mama bilong ol na dispela i brukim stret bel bilong papamama taim ol ritim pas bilong ol pikinini pinis na bihain lukim pes bilong ol taim ol kam aut long bungim.

Aiware i pundaun stret bikos ol papamama i lukim pes bilong pikinini na tingim pas pikinini i raitim long em.

Namel long ol biknem Papua Niugini manmeri bin stap long dispela taim tu em Sif Seketeri bilong Papua Niugini Sir Manasupe Zurenuoc pikinini bilong em tu skul long Jubilee Katolik Sekenderi na stap insait tu long dispela progrem.

Sampela ol bikpela pablik sevis wokmanmeri na ol bikbos bilong ol kampani tu bin kamap long lukim ol pikinini bilong ol long dispela taim.

Dispela 32 Ritrit progrem bin pinis wantaim lotu bung we Pater Glynn i go pas long en. Bihain long lotu Pater Glynn i tok maski yumi kam long narapela narapela lotu, yumi olgeta em Kristen na yumi olgeta bung long apim nem bilong Bikpela long lotu long dispela ritrit progrem.



Rikonsiliesen o sekan

I gat bikpela hevi i bin kamap long St. Michaels Skul insait long Hanuabada peris.

Planti samting nogut i save kamap.

Manmeri bilong Hanuabada na famili i stap klostu long skul in bin bagarapim ol samting long skul.

Ol i bagarapim banis, go insait, stilim ol samting bilong skul, bagarapim toilet, bagarapim paip wara, yusim klasrum long wokim pamuk pasin, na planti moa pasin nogut i save kamap insait long skul eria.

Papamama i save kamap long skul na atekim tisa.

Wanpela mun i go pinis, sampela lain bilong Hanuabada stret i kam long apa praimer na paitim wanpela tisa.

Em i kisim planti sua stret long het bilong em. Ol i no stretim yet dispela trabel.

Na tupela wik i go pinis, long 2 klok moning, sampela yangpela man na meri i laik brukim wanpela klasrum long lowa praimari na wokim pasin pamuk insait long klas rum. Het tisa i stap long skul kompaun i bin stopim ol. Ol i bin tok nogut long het tisa na paitim em tu.

Long dispela as tasol, long Ogas 12 inap long Ogas 18, 2013, ol i bin pasim skul.

Papamama, tisa na bikman bilong edukesen i bin holim wanpela bikpela miting long Trinde 14 Ogas na traim long solvim dispela hevi. Long taim bilong bikpela miting; siaman bilong bod i bin mekim sampela tok i soim olsem em i no wanbel wantaim tisa bilong skul. Em i autim sampela tok-tok i no gutpela tumas long ai bilong papamama, tisa na sumatin. Em i laik rausim sampela tisa na het tisa.

Papamama i no amamas long toktok bilong em. Olsem na ol i laik bai gat wanpela rikonsiliesen namel long Bod siaman wantaim ol tisa bipo ol i opim skul gen long Mande. Sampela papamama i volantia long kamap namel man long dispela rikonsiliesen.

Olsem na long Fraide, 16 Ogas 2013, I gat wanpela rikonsiliesen seremoni i bin kamap long St. Michael Skul. Long sait bilong tisa husat i bin kamap viktum long dispela trabel na siaman i laik rausim tupela; ol i tok klia olsem "Mipela i no gat wanpela hevi wantaim siaman bilong bod".

Taim ol i harim dispela tok, tupela namelman i bin askim siaman, sapos em i gat belhevi wantaim tupela tisa, olsem na em i laik rausim tupela.

Siaman i autim wari bilong em. Wari em i autim i soim olsem em i no laik manmeri/tisa bilong ausait i wok long skul bilong Hanuabada. Em i laik ol Motuan tasol bai kamap tisa long St. Michael Skul. Dispela pasin i stap strong long Hanuabada.

Sapos yumi kaunim 29 tisa i stap long St. Michael skul, i gat wanpela Motu tisa meri tasol i stap. Sapos 28 tisa bai go, inap dispela wanpela Motu tisa bai skulim olgeta 1,500 sumatin i skul long St. Michael Skul? Hamas manmeri bilong Hanuabada i wok tisa? Hamas sumatin bilong Hanuabada i stadi long Tisa Kolis? Nogat ya!

Em i wanpela Katolik Skul. Tasol pasin bilong re-jektim o tok nogat long narapela etnik tisa i wok long St. Michael Skul, i no soim spirit bilong Katolik.

Long tok inglish ol I tok: "Motu for Motuans", dispela slogan i no fit moa long dispela taim bilong yumi nau. Bikos yumi i no inap stopim muvmen bilong manmeri i go na i kam. Nau yumi stap miks wantaim narapela etnik.

Long taim bilong rikonsiliesen, spirit bilong Motu for Motuans i stap strong yet long bel bilong Siaman bilong Bod. Tasol long helpim bilong tupela namelman na narapela manmeri, em i tok orait long tok sori long tupela tisa na sekan wantaim ol.

Olsem na stat long Mande 19 August 2013, Skul bilong St. Michael i op gen. Sumatin na tisa i kam bek gen long skul.

Olsem wanem? Yu ting dispela tingting bilong ri-jektim o tok nogat long narapla etnik grup i wok na stap long ples bilong yumi, bai bringim gutpela samting long komyuniti? I nogat tru!



Wanpela asailam sika i kamaut long balus long Manus Ailan..

Noel Levi i laik lukim senis long Forum

Sekreteri Jenerel bilong Pasifik Ailans Forum Sekreteriet bipo, Sir Noel Levi bilong Papua Niugini, i sapotim dispela nupela Pasifik Ailans Developmen Forum (PIDF).

Sir Noel i ting dispela PIDF em Fiji Prais Minista, Komodo Frank Bainimarama statim i gutpela.

Sir Noel i toktok long nid long senisim ol prairiti bilong dispela Pasifik Ailans Forum (PIF). Sir Noel i tok dispela PIDF we Fiji i go pas long en nau i luk olsem em i gutpela long ol kantri long rijen.

Em i tok taim i senis nau, na dispela PIF i no gutpela moa long ol developmen nid bilong rijen.

Em i tok olgeta tingting na lukluk bilong PIF i mas senis sapos long makim tingting na developmen nid bilong rijen.

Sir Noel i tokaut long dispela taim em i bekim toktok bilong ol sampela akademik na lida long rijen husat i tok i nogat nid long sanapim dispela PIDF olsem narapela rijinel bodi.

Em i tok Forum nau em i mekim ol Pasifik kantri i save lukluk tumas long tupela Australia na Nu Silan long helpim.

Asailam Sikas bai go yet long PNG

...Maski kot salens

FEDEREL Atoni Jenerel, Mark Dreyfus, i tok ol bai go het long salim ol asailam sika i go long Papua Niugini, maski i gat Federel Kot salens long dispela polisi.

Ol lain ya bai go long Manus Ailan maski i gat ligel o kot salens.

Em i tok dispela salens i makim wanpela asailam sika nau i stap pinis long Manus Ailan ditensen senta.

Ol loya i makim em i tok Australia i brukim lo.

Ol loya i tok i no gat evidens olsem PNG bai bihainim toktok bilong em long no ken salim ol asailam sika i go long ol narapela kantri we ol bai bungim hevi.

Long wanpela stetmen, Mista Dreyfus i tok gavman i gat strongpela bilip olsem dispela polisi bai winim wanpela ligel salens,

na bai tok pait strong egensim dispela salens.

Em i tok bai i no gat samting i stopim ol long salim ol asailam sika. Na polisi bilong Gavman bilong Australia bai hat long ol i bihainim taim dispela samting i stap long kot.

Em i tok gavman i bin kisim toksave olsem dispela keis bai stat long Federel Kot na ol loya bilong gavman bai toktok egensim dispela.

Ol i putim pinis aplikesen long Federal Kot, tasol ABC i save olsem ol bai trense i go long Hai Kot.

Rudd kempen long Brisbane

PRAIM Minista bilong Australia, Kevin Rudd, bai traim long holim strong ol ilektoret em Labor Pati i holim nau long Kwinsland taim em i go het long kempen tude.

Mista Rudd i bin statim kempen tude wantaim wanpela strongpela toktok i go long ol sapota bilong wanpela sia bilong Labor, Moreton long Brisbane.

Oposisen Lida Tony Abbott i statim de bilong em long Victoria we em i tokaut long \$25 milien long kamapim gut Great Ocean Road.

Wes Papua fridom flotilla bai go het

WANPELA Fridom Flotilla bai go het long Wes Papua, maski i gat tok lukaut i kam long gavman bilong Indonesian.

Gavman bilong Indonesian i tok em bai yusim nevi na eafos long stopim dispela flotilla i lusim Australia i go long Wes Papua.

Foren Minista bilong Interim Gavman bilong Federel Ripablik ov Wes Papua, Jacob Rumbiak i tok ol i lonsim solwara trip bilong Freedom Flotilla long Kwinsland Australia long Sarere i go pinis.

Mista Rumbiak i tok dispela Flotilla i karim ol toktok bilong belisi na askim gavman bilong Indonesia long sindaun na toktok long ol wari bilong Wes Papua.

Dispela solwara Fridom Flotilla i kamapim bihain flotilla long graun i bin stat long Lake Eyre long South Australia long dispela yia.

Skul pastaim na olgeta samting bai orait stret

Mathew Yakai i raitim

DISPELA song bilong Hitsi Golu, "Pinisim skul pastaim na em bai rait olgeta," em i sutim stret tingting bilong wanpela meri bilong liklik asples Mulitak insait long Laigam Pogera Distrik, Enga provins.

Loretta Rato i gat bikpela tingting olsem marit, karim pikinini na kamapim famili em i no namba wan tingting bilong em. Em i laik pinisim skul pastaim na olgeta samting bai rait olgeta.

Loretta, pikinini bilong wanpela skul tisa bai lusim kantri neks wik Mande na go long Saina long stadi inap long 4-pela yia, stat long Septemba dispela yia.

"Marit em las samting. Mi laik go ovasis, stadi, kamapim nupela tingting na save na kam divolopim kantri bilong mi," Loretta i tok.

Wanpela ogenaiesin ol i kolim Edukesen Pasifik Ejensi (EPA) i rekomendim na painim skul na sponsa bilong Loretta long go skul long Northeastern Universiti long Shengyang siti.

Loretta em i bin pinisim digri bilong em long 2008 long Univesiti bilong PNG long Pot Mosbi long Biochemistry na long Saina bai em i mekim Masta digri long Physical Chemistry

bihain long wanpela yia stadi long tokples Saina.

"Papa na mama bilong mi save givim strongpela skul toktok long wok hat na kisim moa save na bihain wok. Mi bin weitim dispela sans na nau mi amamas," Loretta i tok.

Loretta em i no pret long tokples bilong Saina na kain kain kalsa pasin bilong ol long wanem meri ya i bin wok wantaim Ramu NiCo long Madang, kampani bilong ol Saina na save liklik long haphap tok Saina na pasin na kalsa bilong ol.

"Taim bilong mi wantaim Ramu NiCo i helpim mi long planti samting na em bai helpim mi planti. Ramu NiCo i amamas olsem mi bai go skul na ol i givim sapot bilong ol," em i tok

Loretta i bin wok olsem wanpela Laboretir Teknisin long Basamuk Rifaineri long stat long mun Septemba 2011 i kam inap mun Julai long dispel yia.

"Taim mi bungim birua olsem tokples Saina long wok ples, dispela i givim mi bikpela tingting na strong long go long Saina na stadi long tokples na pasin blong wok so em bai helpim mi bihain taim," Loretta i tok.

Loretta i salensim ol narapela meri insait long kantri olsem ol i no ken tingting long marit hariap na bagarapim laip bilong ol.

"Planti Saina kampani i kam insait long kantri na invest olsem na planti meri i mas go long Saina na stadi long helpim kantri i develop," em i tok.

Loretta i gat bikpela tingting olsem wanpela taim bai em i kamap namel meri insait long luksave bilong PNG na Saina na mekim bikpela senis long develop-im gutpela rilesensip.

Founding Dairekta bilong EPA, Jeffers Teargun Heptol i tok ogenaiesen bilong em i bin helpim 17 sumatin bilong PNG, Fiji na Afrika husat i stadi long Saina na em i laik helpim moa.

"Mi save givim strongpela toktok long planti meri i mas go ovasis na stadi na kisim save long strongim famili na kantri.

Loretta em mipela lukim olsem wanpela strongpela meri na mi helpim em," Jeffers i tok.

Mista Heltol i tok EPA i gat bel long helpim ol sumatin i feil, no gat skul fi, nogat sans long go ovasis na askim planti meri long skul na senisim laip.

Loretta i tok tenkyu long Mista. Heptol long helpim bilong em na em i tok tenkyu long Ramu NiCo long givim planti tingting na save long luksave olsem em i mas go long Saina long skul.



Jeffers Heptol i givim setifiket long Loretta Rato bihain long training long Ramu NiCo.

Sefti long solwara i bikpela samting tru

WANTOK
KOMENTRI

Long dispela wik, ol polis long Rabaul i ares-tim na sasim papa bilong sip mv Rabaul Queen. Ol i sasim em long indai bi-long 162 pipel.

Dispela sip i bin kapsait long biksolwara long Fin-safen long Februeri 2012 na planti manmeri na pikinini tu i bin dai.

Ol dispela lain husat i bin laki long stap laip i gat stori bilong ol long wanem samting i kamapim dispela birua long solwara.

Famili bilong ol lain i bin dai long dispela birua bai amamas long taim ol i harim olsem kot i kamap nau. Ol i wet longpela taim tru long kisim wanpela bekim long gavman bihain long birua i kamap. Ol polis tu i bin mekim bikpela wok long redi long kotim papa bilong sip.

Long taim dispela birua i bin kamap las yia i bin gat panti toktok i kamap long sefti bilong ol bot long solwara.

Plantu pipel bilong yumi long nambis na ol ailan i yusim ol banana bot na liklik bot. Ol i no gat narapela transpot long go i kam.

Oltaim bai yumi lukim ol bot i pulapim tru ol pasindia. I no gat lo i makim hamas pasindia ol liklik bot



i mas karim. Na i no gat ol lain i putim ai na sekap.

Ol papa bilong bot i mekim nating long laik. Dispela kain pasin i save kamapim planti birua long solwara na riva tu.

Ating han bilong gavman husat i bosim transpot bilong solwara i mas raun na sekap long ol bot. Nau em i taim bilong Nesenel Maritaim Sefti Atoriti i mekim wok.

I mas gat lo bilong hamas pasindai ol banana bit i ken karim. Ol bot i mas

gat laip jaket na ol arapela samting bilong sevim laip sapos birua i kamap long solwara.

Toksav long redio long taim bilong ren na win em i narapela rot bilong helpim ol pipel i raun long solwara. Papua Niugini i wok long senis, tasol i luk olsem senis i kamap long taun tasol. Ol pipel long ples tu i mas lukim senis we inap long sevim laip bilong ol.

Trenspot em i bikpela samting. Sapos i gat rot

bai ka i ran na mekim laip bilong pipel i isi. Wankain tu long ples balus.

Sapos i gat ples balus bai balus i ken pundaun na karim ol pipel o kago i go kam. I luk olsem yumi putim mani i go insait long tupela tasol na lusim tingting long trenspot bilong wara.

Yumi save olsem moa pipel bilong Papua Niugini i stap long ol ples longwe na olgeta de ol i save hatwok tru long painim rot bilong go long taun.

Plantu mani tru i save go

long stretim ol rot na ples balus long Mosbi. I tru olsem Mosbi em i bikpela siti na i mas gat gutpela rot na amamasim ol turis o visita i kam raun long kantri bilong yumi.

Tasol yumi mas tingim tu ol arapela sitisen. Ol tu i gat rait long dispela mani gavman i save spendim long kirapim ol bikpela wok bilong trenspot insait long siti. Skelim gut mani long baset na putim sampela bilong kamapim gut sevis bilong trenspot bilong wara.

I gat planti samting yumi ken mekim long helpim ol lain i save yusim trenspot bilong wara.

Sekap na lukim olsem ol bot i seif long karim pasindia, stretim ples bilong wetim sip na pasin bilong givimaut toksave long ol pablik.

Yumi winim yia 2013 pinis na nau em i taim bilong lukim sampela trupela senis i kamap long trenspot sekta. Em i taim bilong opim ai na kirapim wok nau.

Wanem taim bai pait i stop?

YUMI gat bikpela hevi yet long pasin bilong wokim trabel na pait nabaut long taim bilong ileksen insait long kantri.

Insait long 2012 nesenel ileksen, planti pait na trabel i kamap pinis we ol man i dai, na ol haus wantaim kago i paia bikos ol sapota bilong kendidet i birua go kam na pretim pretim arapela manmeri long votim kendidet bilong ol o noken vot.

Plantu ripot kamap pinis we polis i holim planti lain na sasim ol na tu, ronim planti lain long hap bilong kaunim ileksen long en.

Ileksen trabel na birua i no nupela samting bikos em go bek long bipo taim ol arapela ileksen bin kamap pinis.

Tasol nau yumi harim tu olsem ol liklik kaunsel ileksen tu em ol sapota i wok long pulim pait na birua go kam yet long arapela.

Wanem as tru na kain birua na pait pasin save kamap long taim bilong ileksen?.



Bikpela samting em yumi save olsem em taim bilong makim lida husat bai go makim pes bilong yumi long bikpela opis bilong gavman long Waigani na tu long provinsel asembli.

Luk olsem yumi pait long subim lida bilong yumi go long dispela bikpela opis bai yumi amamas long nem bilong em na yumi ken paitim broses olsem lida bilong mi em bikman nau. Bikos em kamap bikman nau, em bai kisim planti mani na tingim mipela long bringim sevis olsem rot, bris, edukesen, helt na arapela bikpela sevis kam long ples.

Luk olsem yumi pait long subim lida bilong yumi go long bikpela opis bikos em bai toktok hat long pulim sampela bikpela bisnis kam bai yumi ken mekim wok na kisim mani long en.

Ating yumi pait bikos lida bilong yumi stret i go long palamen bai yumi ken kisim helpim na mani stret. Nogut narapela lida, bai yumi no inap kaikai wanpela gutpela samting na yumi sindaun tarangu i stap, na arapela bai amamas raun long ai bilong yumi.

Wanem as tru na yumi pait na kilim narapela ples man na kukim haus na kago bilong em? Em tarangu grasrut man olsem yumi tasol ya. Lida i win ya bai givim wanem bikpela samting tru long mi sapos mi kilim narapela man long nem bilong em long winim ileksen?.

Wanpela tingting nau em long askim Iktorel Komisn long gat pawa long stopim ileksen long wanem hap pait na birua i kamap long en, inap ol pipel yet mekim promis olsem ol bai vot gut na nogat trabel na birua samting. Orait ileksen ken kamap bihain.

Sapos ol pait yet orait lusim ol stap na larim ol arapela hap we ileksen i ron gut long en ken go het na pinis gut wantaim

husat i win na kamap memba.

Wanem taim tru bai yumi stop long pait na bagarapim ol samting long taim bilong nesenel ileksen na kaunsel ileksen?.

Dispela em askim go bek long yumi ol lain bilong ples na taun long skelim na tingim pastaim.

Tingim, lo i tok ol lida mas putim mani go stret long ol proyek na sevis stret. Memba mas raitim na soim olgeta pepa wok bilong em. Nogat wanpela mani bai go nating long han bilong wanpela man o meri o sapota nating. Yumi pait bai nogat samting yumi kisim. Sevis na developmen memba kisim kam em bilong olgeta pipel. Sevis em bilong birua bilong yu tu. I no yu tasol we yu pait long en.

Inap nau. Yumi lusim pait na vot isi tasol na larim lida go isi tasol na mekim wok bilong em na bringim sevis na developmen kam long yumi long ples. Em tasol.

WANTOK

Published Weekly, Thursday, for
Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 23%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out on the display advertising form.



UNAITED STEIT - Christopher Lane

Dispela yangpela 22 yia bilong Melbourne Australia beisbal pilaia i wok long ran long Duncan US State bilong Oklahoma long Fraide taim tripela yangpela mangi rong long kar na sutim em. Polis i tok tripela yangpela mangi, krismas bilong ol 15,16 na 17 i lukim Lane i ron pasim ol na ol i bihainim em long kar na sutim em long baksait na ol i tek-off. Ol tripela i nau stap long sas bilong fes-digri meda na bai inap long stap long det penalty.



RASIA-Bagarap

Lukluk kamdaun long fam bilong Isten Rasia long Amur rijin. Otariti i salim toksave olsem haiwara bai kam antap na ol i mas lusim ples hariap. (AFP: Russian Emergencies Ministry)
Brukim rekot haiwara i fosim moa long 19,000 man-meri long haus bilong ol na go long ples antap. Ol reskiu lain i bin salim toksave long bikipela ren bai pundaun yet na ol i mas lukautim ol yet. Planti ol taun na peles i stap ananit long wara long Khabarovsk rijin klostu long boda bilong China, na ol i salim ol ami long go lukautim dispela ples.



AUSTRALIA - Kogan Mobail

Ol Kogan Mobail prepaid yusa bai kisim wanpela teks mesej long Telstra long toksave olsem dispela sevis bai no inap stap moa. Inap long 50 manmeri bai i nogat wok long Melbourne beis mobail fon na intanet sevis provaida ispONE i pundaun wantaim \$30milien dinau mani.



BRITEN - Prince William

Prince William i tok liklik beibi bilong em i wanpela “liklik raskol” na tok pasin papa i senisim em pinis. Em mekim dispela kain tok taim ol poto lain i kisim nambawan poto bilong beibi Prince George. Long fes intaviu wantaim meri bilong em Catherine long Julai 22, Prince William i tok ol i amamas tru long kamap papamama tasol liklik George wok long givim ol hat taim stret.



UNAITED STEIT - Bradley Manning

Kot i bin salim US Soldia Bradley Manning i go long 60 yia kalabus long saplaim tausen hait klasifaid dokumen i go long Wiki Leaks. Tasol lukluk long bikipela rong em i bin mekim, em i gat planti sapota i toktok long givim Nobel Peace Prais i go long em. Ol dispela ol sapota i presenim petisen i go long Nobel Institiut long nominetim em long Nobel Peace Prais. Dispela petisen i bin kamap long Onlain activist ogenaísesen, Roots Action i soim 103,000 manmeri i putim hanmak bilong ol long dispela petisen.

Man i ken mekim planti wok ... Save kilim em

Sape Metta i raitim

SAPOS wanpela man o meri i gat 10, 50, 100 o 200 skil o save long mekim ol kain wok, ating dispela ol namba bai no inap, long wanem, wanpela man i gat 207 skil na save i go pas long olgeta arapela lain.

John Rubi Boggre em i wanpela asples man bilong Kir haus lain long Gembogl Distrik, Simbu Provins em dispela man husat i gat 207 skil o save long mekim ol kain wok.

Planti long ol ddispela skil em long mekim ol wok long sait bilong self rilaiens o wokim ol samting long strong na save bilong yu yet.

Wantok i sindaun na stori wantaim Boggre na askim sapos em i bin go long skul o long wanem rot stret em i kisim dispela skil.

Long bekim, em i tok em i no bin go long wanpela skul.

Em i tok ol dispela ol skil o save bilong ol kain wok em Papa God yet i givim long em.

Na taim em i stap long ples long Promis Len, dispela ol save i wok long develop long tingting bilong em, na em i stat long yusim long kamapim ol samting long we bilong em yet.

Namba wan samting em i traim long en em sigarapim taro na kaukau, miksim, mekim kamap olsem skin na bekim long aven. Na bihain long em i kuk, teis bilong em olsem braun bret.

"Mi no bin go skul, na mi no gat gupela edukesen, tasol save i kilim mi long wokim ol kain samting. Na mi tok tenkyu i go long Papa God long gupela long mi na givim dispela ol save long mi," Boggre i tok.

Em i tok taim em i kirap na wokim planti samting i kamap long ples bilong em, toktok i go aut na planti ol lain long Simbu i stat long painim em i bikos ol i tingting long yusim ol save bilong em long trenim ol arapela manmeri.

"Taim ol manmeri i kirap na painim mi, ol opisa bilong Simbu Provins Gavman tu i painim mi. Na ol i kisim mi i go long Kundiawa na givim wanpela opis spes long mi.

Long opis i no gat ol samting long wokim na mi stap tasol.

"Mi no kisim pe tu inap long 15 krismas mi stap long dispela opis bilong gavman.



"Tasol wan wan taim, mi bin go aut long givim trenim long sampela grup long Westen Hailans husat i bin askim mi long go antap na trenim ol.

"Em tasol mi ken tingim tasol planti arapela taim, mi save westim nating tru long opis long Kundiawa," Boggre i tok.

Em i tok taim em i stap nating long opis, dispela ol save i wok long develop na long wankain taim, em i kisim tingting long wanem hap tru em bai go na skelim dispela ol save em i wok long kisim na putim i stap long tingting bilong em.

Taim dispela kain tingting i kamap, wanpela tingting i kam strong tru olsem em mas lusim Kundiawa na go long Goroka, biktaun bilong Isten Hailans. Em bikos dispela provins i gat wanpela ogenaisesen i stap long kisim em, na mekim gupela yus long ol save bilong em.

Boggre i tok taim dispela strongpela tingting i kisim em, em i lusim opis na go bek long promis len ples bilong em long Goroka.

Em i painim K30.00 bas fe mani na peim PMV bas na go daun long Goroka.

"Mi kamap long Goroka na bikos mi no gat ol wantok long helpim mi, mi go daun long Faniyufa stoa lain na long tripela de na nait,

mi bin slip kirap long hap." Boggre i tok.

Em i tok bihain long slip kirap long hap, liklik brata bilong em i kamap na tokim em olsem, "inap long slip kirap nau, tude bai mitupela i go raun na painim wok."

Olsem na em i kirap na wanbel, na tupela i go painim wok raun long Goroka taun.

Planti ol lain husat i gat ol bekeri i bin soim intres long kisim em, tasol ol i bin askim em long refrens pepa na em i n ogat.

Tasol em i no bisi long wok long ol lain husat i save askim tumas long ol refrens na ol pepa bilong wok.

Long save bilong em, olgeta referens na pepa long wok i stap insait long het na tingting bilong em.

Tupela i raun painim wok, tasol ol i no kisim wanpela wok.

Taim tupela i wokabaut yet, wanpela tingting i kamap na brata bilong em i kirap na tokim em olsem, i gat wanpela ples em i stap we tupela bai go na sekim pastaim bipo long tupela i go long haus.

Na dispela ples em opis bilong Mercy Works Sisters long Goroka.

Taim tupela i go long dispela opis, tupela lukim Sista Maryanne Kolkia husat i dairekta bilong Mercy Sisters. Long toktok tasol,

SAVE KILIM EM: Em i no bin go long wanpela skul, tasol John Rubi Boggre i skelim wanpela long 207 save bilong em long trenim Christine Chalapan long Mercy Works Trening Senta long Yut Senta long Goroka, Isten Hailans Provins. **Poto: Sape Metta**

Sista Maryanne i luksave olsem Boggre em i raitpela man long apim na daunim i go daun planti wok (work load) bilong Mercy Works.

Taim ogenaisesen i givim tok orait long Boggre long kamap olsem wanpela trena long trenim ol manmeri, em i amamas tasol na tok tenkyu long Papa God olsem em i givim stia long em long kamap long Mercy Works Trening Senta.

Boggre i tok insait long 7-pela mun long wok olsem trena, em i amamas tru bikos em i nupela ples bilong wok na em i no olsem long Simbu we em i save sindaun nating na driman long opis i stap.

Maski sapos em wanpela hauslain man tasol, em i kirapim pinis wanpela pis pon long promis len ples.

Nau yet, pis pon i ron na kamap gut long saplain abus na tu lukautim famili bilong em.

Mani em i kisim long salim ol pis em i yusim long baim ol samting long ol stua.

Boggre i tok tenk yu long Mercy Works Sisters na Sista Maryanne long luksave na kisim em, na kamapim em olsem trena long skulim ol narapela wantaim 207 skil na save bilong em.

Was na banis bilong 'Bogia Kokonas Sindrom' bai go het yet

James Kila i raitim

LONG MADANG provins nau yet, i gat pret na tu bikipela banis i stap long daunim na stopim sik-nogut bilong kokonas ol i kolim 'Bogia Kokonas Sindrom' (BCS) long go aut long ol arapela provins long PNG.

Nesenel Agrikalsa Kwarentin na Inspeksen Atoriti (NAQIA) long stat bilong 2012 i bin tokaut long wanpela ripot olsem dispela sik BCS i no gat marasin bilong stopim.

BCS i ken kilim indai kokonas indastri long PNG sapos ol pipel i no was gut, na larim sik ya i go aut long ol narapela provins long kantri.

Nau yet, ol agrikalsa saveman bilong NAQIA, Dipatmen ov Agrikalsa na Laipstok (DAL), PNG Kakao na Kokonas Institiut (PNGCCI) na Kopra Indastri Kopresen (KIK) i wok long karimaut bikipela was na kwarentain sekap long Tapo long rot i go olsem long Madang-Ramu Haiwe.

Ol opisa bilong NAQIA, DAL na ol arapela lain ejeni i tokaut olsem maski Krismas o Niu Yia, ol opisa bai sanap yet long Tapo sek poin na sekim olgeta kar na trak i go aut long Madang.

Ol i bai sekim ol kar na stopim ol kru kokonas na ol dispela i gat skin long go aut long Madang.

Bikipela tambu i stap yet olsem ol samting

i gat lip na kuru long hap bilong Bogia i mas noken go aut long Madang provins. Dispela em bikos bikipela banis i stap nau long stopim dispela sik BCS.

Ol kokonas treida bilong Hailans husat i save baim bikipela namba bilong kokonas saplai long Madang na i laik karim i go antap long Hailans long salim.

Wanpela man husat i save baim kokonas long karim i go long Hailans, Jim Apoga, bilong Kabiufa long Isten Hailans Provins i tok ol i kisim toksave pinis olsem ol mas rausim skin bilong ol kokonas pastaim na karim i go antap long Hailans.

Stat yet long las I kami nap nau, ol lain bilong NAQIA i bin mekim wanpela bikipela awenes long Madang long ol bas stop na tu long bot stop long toksave long ol pipel long banisim dispela sik BCS.

Dispela em bikos taim dispela sik i go long narapela provins em i ken kilim indai ol kokonas na tu ol narapela samting olsem buai na sampela banana.

Dispela sik nogut em ol agrikalsa saveman i bin painim long bus eria bilong Yoro long Bogia na i wok long go bikipela hariap long nambis ples long Bogia.

Insait long awenes, ol i tokaut tu olsem dispela sik nogut bilong kokonas BCS em nogat marasin i stap long stopim.

Olsem na ol pipel i mas was gut tru na noken larim dispela sik i goaut long Bogia na bagarapim kokonas indastri long nara-



Ol kain kokonas i wok long bungim sik. Was gut long ol kokonas na sekim.

pela provins na PNG.

Awenes i tokaut tu olsem ol pipel i mas was gut tru na noken karim ol nupela kuru kokonas

Wanpela entomolojis o saveman bilong NAQIA i tok olsem maski olsem dispela sik nogut bilong kokonas, ol sain bilong em ol i luksave long em 15-pela krismas pastaim.

Em i tok dispela sik nogut em wankain olsem haipa-plasma tasol em i bikipela, tasol ol ol pasin bilong en i wankain.

Long dispela sik bilong kokonas BCS, ol kokonas bai lusim ol lip bilong ol na ol brens bilong kokonas tasol bai sanap.

"Em save kisim tripela 4-pela mun long kokonas i dai," saveman bilong NAQIA i tok.

Insait long Madang provins, planti ol fama i wok long lusim kokonas plantesen bilong ol i go bus nating bikos prais bilong kokonas i go daun na ol i les long wokim kopra.

Long Madang yet, bikipela prodaksen bilong kopra i save kam long Sumkar na Bogia distrik bikos planti ol bikipela plante-sen i stap long hap.

Narapela distrik tu em Raikos, tasol hevi long sait long trenspot i stopim rot bilong ol fama long Raikos distrik long go salim ol kopra bilong ol.

Journal Pre-proof

11

1000

5

15 JULY 2005

1000000

Downloaded from ascelibrary.org by University of California, San Diego on 06/01/15. Copyright ASCE, For All Rights Reserved, No part of this publication may be reproduced without written permission from the publisher.

1000

15 JULY 2004

1000000



1121

at
at

TORO



BIABIA



KANAGE



TOKWIN

Sindaun bilong ol asailam sika hia...
Wanem kainkain ol toktok i wok long go ikam wantaim yumi PNG na Australia bai kamapim wanem samting long bihain taim? Yumi wok long toktok i stap na long las wik tasol wan-pela bot bilong ol asailam sika i kapsait autsait long Krismas Ailan klostu long Australia. Ating faivpela manmeri idai na planti i kisim bagarap..em bai olsem wanem nau? Bai ol i kam long Papua Niugini na kisim

marasin long hia o Australia bai lukautim ol na bihain salim ol i kam long hia..I luk olsem bihain long ol yia i kam,bai yumi gat hamas tausen asailam sika bai kam long hia na pulumapim Manus ailan, na tingim, Manus ailan em liklik ailan. Na sapos ol i kam insait long ples olsem hailans na setoldaun, mi no save long bihaintaim bilong hailans. Bikos planti ol asailam sika bi-long ples Afganistan, Irak o Muslim i save long mekim ol bom long ples bilong ol. Ol i ronawe long bikpela pait long hap.. Bai ol i lainim yumi long we bilong

kamapim ol bom em bai mak nogut nau. Sampela ol birua long traibol pait ples bai kamap olsem ol suisaid bomas long ples bilong ol..Wanem taim ol dispela asailam sika long Afganistan i save long mekim gaden long ples bilong ol? Yu save olsem ol i nogat wail pik, muruk,kapul,sikau, paradais pisin, pisen sinek long ples bi-long ol? Em i orait, mi no save, tasol nogut em wok bilong Bik-man Papa God i salim ol i kam long hia long PNG long senisim sindaun bilong yumi olsem kris-ten kantri...**Tokwin Tasol..**

Long yupela ol gutpela **Wantok** rida i save wokim ol Sudoku kroswod pasel, dispela em nupela SUDOKU.
Long solvim Sudoku pasel, putim wanpela namba long wan wan bokis na olgeta ro olsem akros, daun, na olgeta liklik 9-pela bokis skwea long bikpela daigrem o bokis (i gat 9-pela olgeta) bai gat ol namba long 1 inap long 9. Wanpela namba i mas kamap wanpela taim tasol long wanpela ro. Wok wantaim ol namba olsem gaid o stia na wok long pinisim wan wan daigrem wantaim ol missing namba we bai mekim yu painim solusen. Tenkyu na gutpela pilai

STATIM PILAI

Lukluk long namba 9 kolum, bilong pasel piksa i stap long han kais. i gat ol sain insait long pasel bai i ken toksave long wanem hap insait long dispela kolum bai namba 3 i go.

Nambawan sain i stap long namba 8 kolum insait long piksa. I gat wanpela namba 3 insait long namba 5 bokis. Bai yumi i no i nap long putim wankain namba tupela taim insait long wanpela 3 x 3 bokis eria, olsem na yumi bai i no i nap putim namba 3 insait long bokis namba foa, faiv o siks insait long namba 9 kolum.

Yumi ken rausim tu tripela bokis daunbilo tru long namba 9 kolum bikos i gat wanpela namba 3 insait long dispela 3 x 3 bokis eria tu. Olsem na dispela namba 3 i mas go long namba 2 o 3 bokis bilong namba 9 kolum.

Laspela sain nau i stap insait long namba 2 lain bilong piksa na em i gat wanpela namba 3 pinis long en. Loa bilong pilai i tambu long wanpela namba i kamap tupela taim insait long wanpela lain, olsem na i gat wanpela bokis tasol nau i stap long dispela namba 3 i go insait — em namba 3 bokis bilong namba 9 kolum.

Bihainim dispela stail na wankain tingting na rausim i nap ol pasel bokis i pulap olgeta. Sapos yu laik save moa long insait bilong dispela pilai, yu ken go long webait long penny-dellpuzzles.com.

Ansa bilong las wik SUDOKU 7

4	5	9	6	3	8	7	2	1
8	6	2	7	4	1	9	3	5
7	1	3	2	9	5	4	8	6
9	8	4	1	6	2	5	7	3
3	7	1	5	8	4	6	9	2
6	2	5	3	7	9	8	1	4
2	4	7	9	1	6	3	5	8
5	9	6	8	2	3	1	4	7
1	3	8	4	5	7	2	6	9

	6				8	1		
9	7	4			2	3		
	5		4	6		7		
		8	3					
	4			1			6	
					7	4		
		9		2	5		3	
		2	6			9	5	7
		6	9				2	

Ansa bilong SUDOKU 8 long neks isu.

EMTV Television Guide

7:30 PM G **60 MINUTES –**
8:30 PM MAO **MOVIE – DELIVERANCE**
10:00 PM G **HILLSONG** Rpt. ...
10:30 PM G **NATIONAL EMTV NEWS – Replay**
.....followed by the Australia Network

MANDE OGAS 19, 2013

4:57 AM G **AUSTRALIA NETWORK**
5:00 AM G **JOYCE MEYER**
5:30 AM G **EMTV NEWS REPLAY**
6:00 AM G **TODAY**
9:00 AM **CLASSROOM BROADCAST**
9:00am Grade 7 Mathematics
9:50am Grade 7 Science
10:40am Grade 8 Mathematics
11:20am Grade 8 Science
1:00pm Grade 6 Mathematics
1:50pm Grade 6 Science

2:30pm DEPI Program
3:30 PM G **KIDS KONA**
3:30 PM **HI 5 – S6 Ep#7/30**
4:00PM **MAGICAL TALES EP#26/46**
4:30PM **Jay, Jay the Jet Plane #22/35**
5:00 PM G **KITCHEN WHIZ S4 Ep#4**
5:30 PM G **TOTALLY SPIES EP#15**
5:57 PM G **CRIME STOPPERS**
6:00 PM G **EMTV NATIONAL NEWS**
7:00 PM G **NRL ROUND# 23:**
WEST TIGERS vs. ROOSTERS
9:00 PM G **COCA-COLA S/SCENE EP Ep#26**
9:30 PM G **EMTV NEWS REPLAY**
.....followed by the Australia Network

TUNDE OGAS 20, 2013

4:57 AM G **AUSTRALIA NETWORK**

5:00 AM G **JOYCE MEYER**
5:30 AM G **EMTV NEWS REPLAY**
6:30 AM G **TODAY**
9:00 AM G **CLASSROOM BROADCAST**
9:00am Grade 7 Mathematics
9:50am Grade 7 Science
10:40am Grade 8 Mathematics
11:20am Grade 8 Science
1:00pm Grade 6 Mathematics
1:50pm Grade 6 Science
2:30pm DEPI Program
3:30 PM G **KIDS KONA**
3:30 PM **HI 5 – S6 Ep#8/30**
4:00PM **TBA - MAGICAL TALES**
4:30PM **Jay, Jay the Jet Plane#23/35**

5:00 PM G **KITCHEN WHIZ S4 Ep#5**
5:30 PM G **DANI'S HOUSE YR2. EP#3/13**
6:00 PM G **EMTV NATIONAL NEWS**
7:00 PM G **HAUS & HOME Ep#28**

8:00 PM G **BUSINESS PNG – Ep#31**
8:30 PM PGR **BODY OF PROOF Ep#9**
9:30 PM G **EMTV NEWS REPLAY**
.....followed by the Australia Network

TRINDE OGAS 21, 2013

4:57 AM G **AUSTRALIA NETWORK**
5:00 AM G **JOYCE MEYER**
5:30 AM G **EMTV NEWS REPLAY**
6:00 AM G **TODAY**
9:00 AM **CLASSROOM BROADCAST**
9:00am Grade 7 Mathematics
9:50am Grade 7 Science
10:40am Grade 8 Mathematics
11:20am Grade 8 Science
1:00pm Grade 6 Mathematics
1:50pm Grade 6 Science
2:30pm DEPI Program

3:30 PM G **KIDS KONA**
3:30 PM **HI 5 – S6 Ep#9/30**
4:00PM **MAGICAL TALES EP#23/46**
4:30PM **Jay, Jay the Jet Plane 19/35**
5:00 PM G **TRICKY TV #19/23**
5:30 PM G **TBA**
5:57 PM G **CRIME STOPPERS**
6:00 PM G **EMTV NATIONAL NEWS**
7:00 PM G **FACT FILES:**
8:00 PM G **TOK PIKSA Ep#31– Repeat.....**
8:30 PM MA **ARROW Ep 7:**
10:30 PM G **NEWS REPLAY**
.....followed by the Australia Network

Ol Progam na Kilok i ken senis oltaim...

Raun wantaim Kanage olgeta wik

'Kuk mi da food'

Bubu Kanage i stap wantaimmisis bilong em, Iriputi, long Poronola ples insait long Kagua distrik, Sauten Hailans. Bubu Kanage em bilong Raguete na em marit i go long Poronola. Wanpela taim Kanage kirap tokim Iriputi long tupela i go long ples bilong em. Iriputi tokim Kanage olsem, "Maski, ples bilong yu nogat wara long dring na kukim kaikai, kaikai sot na tu, ples bilong i long wetumas. Olsem na maski, yumi stap!" Bubu Kanage strongim sait tasol misis daunim em olgeta. Olgeta toktok wokim na bubu Kanage i hangere. Em nau em i tokim Iriputi, "Iriputi, plis kuk mi da food na boil da water for ti!" Iriputi harim dispela tok na em i no wanbel. Em tokim Kanage, "Papa, tok inglis bilong yu i no kam gut tumas na mi no amamas olgeta long lek gras i go pinis long het gras bilong yu". Bubu Kanage i no nogat moa toktok.

Simon Alex SHP

Traim tasol maths blo yu

Kanage em wanpela mangi bilong ples. Em man bilong tok pilai long ol lapun na ol yangpela manmeri. Wanpela taim em i go raun long maket long Kimbe. Wanpela lapun meri sindaun salim pinat i stap.



Meri ya salim pinat long 20t long wanpela liklik hip. Kanage i go na askim mama ya, "Hamas long pinat?" Mama ya bekim, "Em 20t tasol!". Kanage tromoi 40t na kisim tupela lus pinat. Mama ya paol na askim em, "Pikinini, yu orait o?" Kanage tanim na tokim em, "Se, mi orait. Mi traim tasol maths bilong yu. Nogut em ros liklik!". Mama ya i no givim sas long Kanage long kisim ol pinat bilong em. Em ronim em i kam aut long maket.

Mista Jikanda Bialla

Ekting Prea

Kanage i wok wantaim G4S Sekuriti Gad. Kanage i save wok long nait, wanpela nait Kanage i slip na stap taim em i pasim ai na slip, em i harim but bilong supavaisa i pairap long simen na i wokabout i kam long ples we Kanage i slip

stap long en. Taim bos i kam sanap pinis long pes bilong Kanage, na Kanage i save pinis olsem em i lukim em i slip i stap. So wan tu Kanage tok, Amen! na bihain em i opim ai na lukluk long supavaisa i ting em mas distepim em long prea na em i tok, sori Kanage mi no save yu prea na stap, nogat mi ting yu slip na klostu mi laik butim yu. Sori tru, gutpela sekuriti! Na Kanage i tok olsem, bos em nomol pasin long laip bilong mi ya. Tasol samting tru Kanage i slip i stap.

Andrew Broun

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: jwilson@wantok.com.pg

Famili stopim mi long kisim ol entaitelmen long man bilong mi na mi wari. Inap yupela givim mi sampela helpim?

Dia Laipain,

MI NA man bilong mi i bin marit long 30 krismas, tasol long las yia man bilong mi i bin dai. Mi wanpela wido nau na mi nogat pikinini bilong mi yet husat inap helpim mi long ol samting mi laik wokim long en.

Man bilong mi nau i dai i bilong narapela provins na mi tu i bilong narapela provins. Ol famili bilong man bilong mi i no amamas na ol i kros long mi bikos mi nogat pikinini na ol narapela samting moa. Mitupela man bilong mi i bin marit aninit long loa na em bin wanpela sinia publik sevani.

Mi painim hat long klia watpo ol lain famili bilong man bilong mi i wok long stopim mi long kisim ol entaitelmen o mani bilong man bilong mi bikos ol i tok mi no bin karim pikinini long em na olsem, mi mas noken kisim ol entaitelmen bilong em.

Mi painim hat na bai mi mekim wanem?

WIDOW IN DISTRESS

Pren

Mipela i sori long ritim stori bilong yu. Mipela i luksave olsem em no gutpela long ol lain i stap klostu long yu i wokim ol dispela samting long yu. Laik pasin we i bin bungim na pasim yu na man bilong yu i dai nau em wankain laik pasin ya i bin opim dua long haus bilong yu. Mipela i bilip olsem yu bin mekim gut long ol lain famili bilong man bilong yu taim em i stap laip. Mipela i sori olsem nau ol tambu bilong yu i no inap mekim gut long yu olsem yu bin mekim long ol.

Bikos yu no bin gat pikinini long man bilong yu, ol tambu bilong yu i no wanbel long yu kisim ol entaitelmen mani bi-



long em, tasol mipela i ting olsem i gat rum long toktok na painim ol ansa long hevi na wari yupela i gat long en.

Pren, i moabeta olsem yu na ol tambu bilong yu i luksave olsem laik pasin i save pulim man na meri wantaim long marit na stap wantaim. Dispela kain poroman i save gro long eria bilong sering na lukautim gut wanpela arapela long gutpela taim na long taim nogut inap dai i painim wanpela. Mipela i bilip olsem as bilong marit em long strongpela laik, luksave na rispek na maski yupela i ken stap gut wantaim ol pikinini na tu, taim yupela i nogat pikinini.

Ol mani samting man bilong yu i lusim taim em i dai i bilong yu na i moabeta yu sekim bikos sapos samting ol tambu bilong yu i wokim i no fea na i no stret. i moabeta yu sekim wantaim ol atoriti i save moa long dispela samting long helpim yu kisim ol entaitelmen mani. Pren, i moabeta yu go long opis we man bilong yu i bin wok long em na tokim ol long wari yu gat long en. Long wankain taim, i moabeta yu go long Leba Dipatmen long givim yu ol stiatok long dispela samting.

Pren, samting yu bungim em mipela i luksave long en na plnati ol narapela famili tu i bungim long en. Tasol yumi mas stretim gut ol dispela kain samting.

Yumi luksave olsem sampela samting i save kamap taim ol lain yumi laikim i no moa stap wantaim yumi. i moabeta

yu no wokim samting long kamapim moa hevi tasol wok wantaim ol tambu bilong yu long kamap wantaim solusen o ansa bai yupela wantaim i wanbel long en.

I moabeta yu no lukim dispela wari long entaitelmen long dai man bilong yu olsem samting bai kamapim hevi, tasol olsem sans long yu na ol tambu bilong yu i stretim wok pren namel long yupela. Ating taim yupela i toktok wantaim, ol tambu bilong yu i ken lukim olsem samting ol i mekim i no stret. Ating long pasin kastom bilong yumi, ol i lukim olsem em i orait, tasol long ligel marti we yupela i marit bihainim lo, i gat lo i stap bilong lukautim yu, maski yu gat o i nogat pikinini.

Pren, mipela i amamas long yu long sanap strong na yu laikim pasin jastis i kamap. Mipela i strongim yu long pre-tim God na i no man bikos man bai feilim yu tasol wantaim God, em bai nogat. Ritim Buk bilong Matyu, Sapta 10 na Ves26-28.

I moabeta yu go lukim Opis bilong Kureta long kisim moa toktok na stiatok long ol mani samting man bilong yu i dai na lusim.

God i ken givim yu gutpela stia na strong

Pren bilong yu, Laipain

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laipain



NEM: Nick Kwau

KRISMAS: 30 (Man)

ADRES: PO. Box 1349, Wewak, East Sepik Provins
SAVE LAIKIM: Ritim buk, singsing, go Lotu, mekim pren wantaim arapela and trevol.

NEM: Raphael Iwap

KRISMAS: 18 (Man)

ADRES: St. Michael Secondary School, PO. Box Private Mail Bag, Madang Provins
SAVE LAIKIM: Pilai gems, pilaim musik, operetim Kompyuta, wok teknisen, ritim buk, na go long skul

NEM: Vincent Awon

KRISMAS: 30 (man)

ADRES: Kamate Coca Co-operative Society Limited, PO Box 298 Madang Provins
SAVE LAIKIM: Welding, cocoa trena, menesim bloks, Raising Beans long ekspot, mekim fani, harim musik na painim wanpela meri long maritim na stap wantaim oltaim.

NEM: Junior B. Dadis

KRISMAS: 32 (Man)

ADRES: College of Distant Education, PO Box 2071, Yomba, Madang Provins
SAVE LAIKIM: Go danis, harim reggae musik, lukim CD, tok pilai na go swim

NEM: Jason Elmon

KRISMAS: 19 (Man)

ADRES: Bema High School, PMB Bema, Lae Post Office Morobe Provins
SAVE LAIKIM: Mekim pren, pilai soka, go Lotu, mekim fani na toktok wantaim ol narapela lain.

NEM: Gabriel Bania

KRISMAS: 23 (Man)

ADRES: St. Christopher Primary School Turubu East Coast, C/- Bill Orengo PO Box 466, Wewak ESP
SAVE LAIKIM: Autim tok bilong God, serim toktok ol samting, pilai gospol musik, helpim na mekim wok marimari na go Lotu.

NEM: Jenna Hill

KRISMAS: 35 (Meri)

ADRES: PO Box 90, Adoagyiri, Nsawam Ghana, West Africa - 00233 541705015 e-mel: waysofl@yahoo.com
SAVE LAIKIM: Kantri musik, kukim kaikai, raitim pas na painim wanpela man long maritim

NEM: Rex Yatapsa

KRISMAS: 30 (Man)

ADRES: Wambi DC, PO Box 352, Bulolo Morobee Provins
SAVE LAIKIM: Go Lotu, serim tok bilong God wantaim arapela, stretim hevi bilong ol arapela manmeri, Wok gol na wokim gaden.

NEM: Robert Daniel

KRISMAS: 14 (Man)

ADRES: Kanabea Catholic Mission, PO Box 90, Via Kerema, Gulf Provins
SAVE LAIKIM: Pilai gita, volibol, soka, tats, mekim fani, stori, watsim TV, harim Lotu musik, go skul, tek pat long yut wok, go Lotu na lukautim ol enimal na plans.

NEM: Awaten Kembo

KRISMAS: 20 (man)

ADRES: Bema High School, PMB Lae, Morobe Provins
SAVE LAIKIM: Pilai volibol, vok, basketbol, harim musik, mekim fani, go Lotu, ritim buk na niuspepa na stori wantaim ol poroman-meri.

InterOil winmani i pundaun

Stanley Nondol i raitim

PAPUA NIUGINI oil na ges kampani, InterOil i tokaut olsem winmani bilong em long namba tu kwata bilong 2013 i pudaun long \$13.2 milian o moa long K35 milien na long wankain taim long 1012 winmani bilong kampani i pundaun long \$31.7 milien

o moa long K74 milien.

InterOil namba tu kwata ripot go long Stok Eksens long las wik i soim olsem, maski kampani winmani i bin pundaun long bikpela milien kina, bisnis i l groa yet na em i kam antap long \$18.5 milian o moa long K43 milien, na winim las yia winmani risalt.

Kampani i tok dispela pu-daun bilong winmani i kamap

bikos prais bilong krud oil, na ol prodak prais bin stap gut na las yia bikpela winmani i pudaun bikos ol dispela prais bin kam daun.

Kampani i tok, inkam o revenu bin go antap long \$46.6milien o moa long K100milien bikos kampani bin salim planti prodak long namba tu kwata bilong 2013.

Long namba tu kaeta,

kampani salim totel volum bi-long ol prodak sanap long 2.4 milien barels na long wankain kweta long las yia kampani salim 1.8 milien barel.

Sif Eksekativ Opisa bilong kampani Dokta Michael Hes-sion i tok, kampani gat bikpela na gutpela aset na bai gohet long oil, na ges bis-nis long kantri.

Dokta Hession i tok kamapni bai wok yet long di-velopim kantri na i tok bai gohet long mekim planti bis-nis long oil refaineri,holssel, na ritel petroleum distribusen, na wok long ges eria na ek-sploresen wok.

Em i tok bisnis divelomen bilong kampani bai go het long mekim planti elksplore-sen wok na bai putim bikpela

mani long lukim wok kamap long Petroleum Prospektng Laisens 236 long Waho. Em i tok taim dispela kamap bai moa eksploresen patna kamapani bai mekim long kantri.

Long wankain taim kapani i toktok wantaim Exxon Mobil PNG long kamapim wok long PRL 15 we Elk Entelop i stap.

Fiul prais i go antap

INDIPENDEN Konsiuma na Kom-petisen Komisin (ICCC) i tokaut pinis gen long prais bilong fiul, bensin, disel na kerosin i senis long mun Ogas.

Dispela em toksave indipenden Konsiuma Kompetisen Komisin (ICCC) i kisim long interOil long ol fiul prais bilong bensin, disel na kerosin i kam insait long kantri.

ICCC komisina, Dokta Billy Manoka i tok prais bilong ol tripela fiul long impot Pariti Prais (IPP) mak i bin go antap long dispela mun. Dispela em i go wantaim namel prais bilong Min ov Plats Singapore (MOPS) prais we ol interOil i kisim long ol saplaia bilong ol long ovasi.

Wantaim senis bilong prais long IPP, namel prais bilong ol fiul long olgeta senta long kantri bai senis bihainim hamas ol bai i peim long karim fiul kago i go i kam. Nau i luk olsem bai prais long ol sevis stesin na fiul kampani bai sanap olsem:

Bensin (petrol) bai i go antap 8.53 toea long wanpela lita, disel bai i go antap 8.23 toea long wan-pela lita, kerosin prais bai i go antap 9.17 toea long wanpela lita.

Fiul prais i go antap insait long kantri tu i bihainim bikpela kos bi-long karim fiul long ol sip long nambtri kwota na tu mak bilong kina i wok long go daun na ol prais bilong krud wel i go antap yet long mun Julai 2013.

Dokta Manoka i tok klia olsem Komisen i save makim tasol holssel na ritel majin long wan wan yia, tasol IPP em i save kam wantaim

projek agrimen bilong interOil ICCC i save was tu long ol prais bilong sip na rot kago insait long kantri, long olgeta tripela mun bihainim prais bilong ol kampani i save salim fiul, wantaim pe bilong trenspot in-sait long kantri.

Olsem na taim ol i bungim olgeta kos, dispela lista bai soim ol fiul prais i ken i go antap long wanem mak insait long Pot Mosbi, stat long 8 Ogas, 2013.

Ol ritel prais bilong olgeta senta long kantri bai senis wantaim nara-pela kos bilong ol lokal trenspot i go antap tu.

Ol opisa bilong komisin bai i wokim sekim ol sevis stesin stat long las wik, 8 Ogas 2013, long lukim ol i mas salim ol fiul long prais we gavman i tok orait long en. Dokta Manoka i tok long ol fiul saplaia i mas makim prais bilong ol long ol prais mak bilong mun Ogas yet.

Ritel Prais bilong fiul long Pot Mosbi long toea long wanwan lita i sanap olsem.

IPP bensin 198.0870 (tpl), disel 203.2735 (tpl), kerosin 198.3688 (tpl). Domestik freit (sip na kar) bensin 61.00, disel 6.00, kerosin 0.00. Holssel Majin, bensin 12.20, disel 13.16, kerosin 12.74. Ritel Majin, bensin 35.8, disel 35.8, kerosin 35.8. GST (10%) pesen, bensin, disel na kerosin 20.7 pesen. Ritel prais long dispela mun; bensin 360.57 (K3.61), disel 306.83(K3.07) kerosin 294.37 (K2.94). Ritel prais long las mun; bensin 352.03 (K3.52), disel 298.59 (K2.99), kerosin 285.20

Teknoloji na Rises em nambawan long bisnis

MINISTA bilong Tresari Don Polye i tok Infomesen Teknoloji em nam-bawan samting long helpim long menesim risos na groim economy na divelopim kantri.

Minista Polye i mekim dispela tok-tok las wik long Pot Mosbi long wan-pela miting bilong Opis bilong Haia Edukesen. Em i tok wol nau go in-sait long bikpela save bilong In-fomesen Teknoloji long mekim kain kian wok long mekim laip isi na PNG tu mas go wantaim dispela senis na save bilong komputa.

Mista Polye i tok kantri i bai bungim ol risos na investim moa long eria bilong rises na Teknoloji . Em o tok dispela bai helpim long pi-laim bikpela wok long kantri ken gat gutpela menesmen long neturel risos, groim ekonomi, promotim gut-pela sevis deliveri, na gutpela sevis long helt eduquesen na moa.

Mista Polye tok long lukim Visin

2050 bilong gavman i karim kaikai, Infomesen Teknoloji em wanpela bikpela samting long sait bilong komputa wol we nau olgeta samting i kamap isi .

Minista Polye i tok gavman bai givim mani sapot long helpim In-fomesen Teknoloji wok long kantri long lukim gutpela wok i ken kamap long givim sevis long ol pipel. Em tok gavman bai lukluk long dispela long bikpela mak na givim sapot long 2014 baset.

Minista bilong Tresari i tok olsem gavman bai fandim rises na teknoaloji na tok ol mani mas go stret long wok na em i tok Rises Senta tu i ken lukluk long narapela patna long helpim.

Mista Polye i tok patnasip em bikpela samting long helpim rises wok na tok ol gavman na praivet bodi long bung na wok wantaim long kamapim gutpela wok.

Prais nau i sanap olsem bai yu lukim long dispela lista aninit.

IPP Kina long wanpela lita			
Mun	Bensin (Kina/lita)	Disel (Kina/lita)	Kerosin (Kina/lita)
Julai	K1.90	K1.96	K1.90
Ogas	K1.98	K2.03	K1.98
Senis	K0.08 (i go antap)	K0.07 (i go antap)	K0.08 (i go antap)

(K2.85). Prais Veriens (+/-) toea disel 8.24 tpl, kerosin 9.17 tpl. pesen, disel 2.76 pesen, kerosin long wan wan lita, bensin 8.54 tpl, Pesen bilong senis; bensin 2.43 3.22 pesen.



Wantok

NIUSPEPA BILONG YUMI OL PNG STRET!

Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the **WANTOK** to you each week. We publish the WANTOK 52 times a year.

AIRMAIL SUBSCRIPTION RATES (includes postage & handling)
PNG K220.00, Australia/New Zealand US\$110.00, Asia/Pacific US\$150.00
Rest of the World US\$210.00

NCD HOME DELIVERY
80t per copy or K65.00 for two or more copies. Office pickup K52.00 per year for a copy.

Please send me.....copy/copies of WANTOK for one year.

I enclose Kina/USD..... as full payment.

Name.....

Postal Address.....

City.....

State/Province.....(abbreviation)

Country..... Zip/Postal Code.....

Street Address.....

Telephone.....Fax.....

Email.....

Signed.....Date.....

Address: Subscriptions
Word Publishing Company Ltd
PO BOX 1982
Boroko, NCD 111
Papua New Guinea

Attn: **Luke MEK** (Circulation & Distribution)

OTDF givim K59.9m long Aiambak Lek Mari rot

Stanley Nondol i raitim

OK Tedi Mining Limited aninit long Westen Provins Pipels Dividen Trast Fans (WPPDTF) i putim K59.9 milian long opim rot bilong ol pipel long Aiambak na Lake Murray long Midel Flai long Westen Province.

Menesing Darekta bilong OK Tedi Maining Limited Nigel Parker na Western Provins Gavana Ati Wobiro long wikend i mekim graun breking seremoni long Aiambak long Midel Flai long K59.9 milien rot wantaim K20m Helt progrem long Westen Provins.

Disapela mani em bilong ol Western Provins pipel yet we OK Tedi Developmen Faundesen i

menesim aninit long Komyuniti Kontinuesen Maining Agrimen o CMCA program we i gat agrimen namel long papagraun na OT Tedi Mining olsem OTDF bai lukautim CMCA mani long mekim wok divelopmen long CMCA eria.

CMCA em wanpela agrimen namel long papagraun stap long het bilong OK Tedi riva go long as bilong OK tedi riva we bung wantaim Fly riva, we wok mining pipia bilong main i save go long OK Tedi riva na em ken kamapim bagrap long envairnme

Dispela em bikpela hanmak bilong OTML ol pipel lukim bihain long planti yia we ol tok ol I no lukim sevis bilong gavman.

Taim K50 kilomita Aiambak Lake Murry rot i pinis bai mekim isi long ol pipel ken kisim ol maket samting olsem raba, pis, kokonas



OTML Menesing Darekta Nigel Paker (namel) na OTDF CEO Ian Middleton, Westen Provins Gavana Ati Wobiro na Westen provinsel Adminsreta brukim graun long ples Aiambak long Midel Fly Distrik long makim opim bilong K59.9 Kiunga Aiambak rot we OTDF fandim aninit long CAMC.

ol arapela krop i go kwik long sip MV Flai long kisim ol go long Kiunga na Daru maket na taun.

Taim dispela rot i pinis bai opim rot long ol helt lain tu i ken go insait long eria kwik wantaim marasin long helpim ol sik manmeri na bebi na tu bai helpim ol skul pikinini na tisa long Midel Flai.

Westen provins em wanpela gutpela provins tru na dispela rot i pinis tu bai pulim ol turis go insait long eria.

Lokal Konstruksen Kampani Starwest bai go pas long mekim dispela wok. Starwest stap na wok longpela taim long provins.

Ol lida bilong Saut Flai i amamas long dispela rot we bai givim sevis long ol na tok ol bai wok bung wantaim ol divelopa, Statwest, OTDF memesen na ol CMCA lidas long helpim ol pipel long kisim besik sevis.

Wok bilong main i stap long provins moa long 30 yia tasol, ol rot long provins I bagarap o planti viles I no gat rot koneksen na tu no gat helt sevis long planti eria tu.

Nau long CMCA we OTML na papagraun kamapimi lukim sampela gutpela sevis wok long go insait long eria.

No gat han mak bilong gavman long dispela eria ilong independens i kam inap nau na ol lida i singaut long OTML long mekim wok divelopmen.



Wantok

Advertise your Business right here!!

We deliver your message right to the remote areas of PNG where others don't go.

Wantok Niuspepa is your medium to communicate your business now.

**Niuspepa
Bilong Yumi Ol
PNG Stret!!**



Call the Advertising team on,
Ph: 3252500 Fax: 3252579 or
Email: advertising@wantok.com.pg or
Website: www.Wantokniuspepa.com

InterOil redi long ekspolresen wok

INTEROIL i tokaut long dispela wik olsem em redi long wok drilling na eksplioresen long Gulp provins wantaim \$75 milian o klostu long K300 milien dinau mani.

InterOil kampani i tok em kisim dinau long BSP na Westpac long mekim eksplioresen na drilling long Elk na Entelop long Petroleum Retensen Laisens 15, na tokaut olsem em statim tokotk wantaim Exxon Mobil long mekim dispela wok.

InterOil i tok em bai go het na wok wantaim ExxonMobil PNG long ges projek long kantri long givim gutpela sevis long ol se holda long Papua Niugini.

Kampani Ekseketiv Vais Preseden bilong Korpret na Gavman Relisen, Keli Taureka i tok kampani i tokotk wantaim nesenel gavman na Gulp gavana long wanem samting kampani i mekim long statim wok drilling long ges na oil long Gulp.

Mista Taureka i tok olgeta aset na bisnis bilong OnterOil i stap long kantri na kampani i komited long helpim gavman long di-

velopim neturel risos.

Mista Taureka i tok kampani em bikpela provaida bilong fuel insait long kantri na amamas long strongpela pren namel long gavman, papagraun na kampani.

InterOil i tok sabsideri bilong em, InterOil Prodak Limited i sainim wanpela yia dinau wantaim Westpac Limited na BSPLimited long kampani ken yusim \$75 milien long wok bilong drilling na eksplioresen.

Mista Taurekail tok dispela dinau em bilong wok long eksplioresen na drilling wantaim \$37.5 milian bilong yusim kwik-taim, taim kampani i sainim agrimen long statim wok long Elk na Entelope.

Kampani i tok i gat narapela K140 milien stap wantaim BSP na Westpac we kampani i no yusim yet aninit long daunstrim divisen na pruden kepitel menesemen.

Taim kampani i tokaut long ripot bilong namba tu kwata bilong 2013 las wik, kampani tok em bai mekim moa wok eksplioresen patna long groim bisnis bilong em.

Minerel Polisi mas luksave long papagraun: Basil

Stanley Nondol i raitim

MINERL Risos Atoriti mas lukluk long kamapim bikipela senis long polisi na givim bikipela luksave na sevis go long papagraun bilong main eria insait long kantri.

Gavman mas noken ronwe long ol hevi bilong papagraun bilong ol risis eria na maining kampani na mas sanap na karim hevi bilong na tok ol memba bilong palamen mas sapotim Kondra Bill long givim luksave go bek long papagraun.

Memba bilong Bulolo Sam Basil long aste i mekim dispela toktok long tok tenkyu long Mineral Risos Atoriti i holim miting mekim reviu long Mineral Polisi. Dispela miting kamap long tripela rijen long kantri na bai pinis long Mosbi long dispela wik Fraide.

Mista Basil i tok ol bikipela toktok i kamap long dispela miting namel long papagraun na stekholda na gavman mas lukluk long wanem samting MRA bai mekim.

Mista Basil i tok gavman i mas makim ol pipel na karim hevi na wari bilong ol papagraun. Em tok planti taim gavman save les long harim hevi bilong papagraun na save ronwe na ol papagraun i no save kisim gutpela sevis

long ol risos bilong ol.

Mista Basil i tok, sapos Kondra Bill i kamap lo bai givim bikipela sans go long ol papagraun long kisim sevis long ol risos bilong ol

"Long Septemba 2011, Minista bilong Maining Byron Chan i bin sapotim Boka Kondra bil tasol ol maining kampani i putim presa long Praim Minista O'Neill long go insait na rausim dispela bil." Mista Basil i tok.

Mista Basil i tok bikipela bilien i nau kamap long ol maining na ol arapela risos. Em i tok olgeta memba bilong palamen wantaim ol stekholda mas sapotim Boka Kondra Bill na kamapim lo na givim bikipela sevis go bek long ol papagraun.

Mista Basil i tok sampela senis long Minerel Polisi we bai kamap nau long dispela miting em i hat wok bilong ol papagraun na ol komyuniti bilong risos eria we kisim bagrap long wok maining.

Depiuti Oposisen lida i tok i gat bikipela hevi stap long manining na rios namel long papagraun, divelopa, provinsel gavman na nesnel gavman. Dispela polisi rivi em bai helpim long daunim dispela ol hevi stap long pelataim.

Mista Basil i tok MRA long

polisi mas lukluk long; papagraun kampani holim Eksploresen Laisens, papagraun mas holim hap bilong wanem gavman bai holim long maining eria, mas tok nogat long gavman plen long kisim 5 pesen sea long main, royalti

we nau stap long 2 pesen mas apim go long 5 pesen.

Mista Basil i tok MRA mas lukluk long 50 pesen bilong winmani mas go long papagraun, 15 pesen go long provinsel gavman, 10 pesen go long ol komyuniti stap

klostu long main.

Mista Basil tok MRA mas lukluk long putim go insait long polisi na tok olgeta memba bilong palamen we i gat main mas sanap na tokotk strong long sapotim Kondra bil taim em i kam long

palamen.

Mista Basil i tok nau long Polisi Rivi miting, planti bikman bilong maining kampani i mitim ol MRA miting komiti na toktok long praivet na dispela em i no inap helpim kantri.



40 THOUSAND SEAT SALE

40 YEARS STRONG **40 THOUSAND SEATS** **40% FARE**

Celebrating it's 40th year of safe operations, Air Niugini offers valued travellers our Anniversary Sale! Offer is valid from 1st September 2013 to 1st December 2013.

Book early to secure your seat!

Thank you for being a part of the airline's growth and success.

Call Toll Free on **180 3444** or contact your nearest Air Niugini Travel Centre or Travel Agent for further details.

* The Anniversary Sale offer is valid from 1st Sep to 1st Dec. 2013. Conditions apply.

40 YEARS  **Air Niugini**

www.airniugini.com.pg



CONGRATULATIONS TO THE BONUS KIT HOME WINNER

Jackson Wendt Pope of Kutubu. The more you Top Up the more entries you get.

SEKYURITI WINIM DIGICEL KIT HOME:

Wina bilong Digicel Kit Home em Jackson Endi bilong Mendi SHP. Jackson em sekyuriti gad long Kutubu. Digicel kolim em aste na toksave long em winim topap promosen Kit Home.



GLASIM RAMU NICO PROJEK



Wanpela Ramu NiCo, Wanpela Komyuniti

Ganglau bai gat nupela hausik

TAIM yu lukluk long ai bilong em bai yu sore stret bilong wanem Baksan Masa, wanepela Komyuniti Helt Woka i hat work stret long helivim ol pipol bilong Ganglau, Mindre, Tugiyag na ol narapela ples long Basamuk insait long Raikos, Madang long wok dokta na givim marasin.

Mama ya holim pikinini na Baksan i laik givim sut long pikinini tasol pikinini i krai bilong wanem em i poret long sut ya. Tasol tarangu, dispela pikinini i no save olsem Baksan i laik long helivim em.

Baksan em i save wok long Ganglau Eid Pos klostu tasol long Basamuk Rifaineri bilong Ramu NiCo. Em yet asples Tugiyag. Tasol em i bin pinisim skul long Karkar long yia 1975 na wok long Karkar, Matop, Teptep na ol narapela ples olsem dokta boi.

Em i brukim bus, solwara, nam-bis na karim marasin long sevim laip bilong ol maunten pipol, wara pipol, mambis pipol na solwara pipol tu.

Tete, em i tok maski raun nam-baut na Baksan i stap long ples na wok. Tasol stori bilong em i sore stret. Long ol dispela taim, em i save wok olsem wanpela kesual wokman bilong gavaman na kisim pei mak olsem K150. tasol ikam inap 2007 we gavaman i luksave long em olsem wok man bilong gavaman stret.

"Maski ol i luksave long mi, pei i no gutpela tasol mi wok yet," Baksan i tok.

Baksan em i wok long Ganglau hausik we Highlands Pacific I bin wokim bipo na tete i stap ananit long han bilong gavaman.

Tasol em i tok gavaman i no save givim planti marasin na populesin bilong ol pipol husait i sik i antap tumas na marasin i save sot areap.

"Ramu NiCo i save givim marasin mak long K3,000. olgeta mun tasol planti pipol na i no inap. Bipo em orait," Maksan i tok.

Ganglau hausik tu i olupela na nogat gutpela rum bilong dokta boi bai sindaun na wokim wok gut. Na ol haus tu bilong slip i no gutpela, nogat lait na ol samting bilong helvim dokta na fameli bilong em long em bai hamamas na was long sik bilong ol pipol.

Tasol wanpela gutpela nius ikamap olsem gavaman i bai wokim wanpela nupela helt senta long Ganglau ananit long luksave bilong Memorandum ov Agrimen (MOA) bilong Ramu NiCo Projek we gavaman i mas wokim sampela projek ananit long namba tu pes bilong konstruksen.

Dispela nupela hausik em i mak long K1.886 million na papa graun

kampani, Basamuk Entaprais Ltd bai wokim na pinisim insait long 6-pela mun tasol.

Ananit long dispela kontrak bai Basamuk Enterprises i wokim 3-pela haus bilong slip, wanpela ward bilong sik man na meri, wanpela toilet, wanpela nupela generate bilong pawa na ples bilong trumai rabis.

Ol bos man bilong Basamuk Enterprises na gavaman i sainim dispela kontrak long Tunde Agus 6 long Pot Mosebi na nau Basamuk enterprises i reri tasol long gavaman bai givim mani long ol mekim wok.

Dispels hausik, taim ol i pinisim bai helivim planti man na meri wantaim lapun na pikinini husait i sik. Planti hap insait long Raikos i no gat hausik na ol pipol klostu long Saidor na go antap olsem Raikos ai skul save go long Ganglau long kisim marasain. Dispela nupela hausik bai helivim ol stret.

Generel Menesa bilong Basamuk Enterprises, Mista Leo Andrew i tok as tingting bilong Basamuk Enterprises em ino long mekim win moni tasol bai wok hat long kamapim gutpela hausik na givim long ol pipol bilong wanem ol i nidim dispela sevis stret.

Komuniti Helt Woka, Baksan Masa i tok em i hamamas olsem Ganglau bai i lukim nupela hausik na bai givim sevis long ol pipol gut stret.

"Mi save givim marasin long 500 pipol i go 600 long wanwan dei na em planti tumas. Marasin sot na wok man tu i sot na gavaman i mas givim moa marasin na wok man taim i gat nupela hausik," Baksan i toktok.

Em i tok taim bipol ol i save givim liklik marasin em i orait taim nogat planti manmeri tasol tete Rifaineri bilong Ramu NiCo mekim na i gat planti manmeri na marasin na wok man tu i mas go antap.

Ol pipol bilong Basamuk na Raikos i mas luksave tete olsem we i gat ol bikpela risos long kamapim win mani bilong gavaman na kantri, gavaman i save kisim ol bikpela ol infrastraksa sevis i go long ol pipol na asples.

Sapos nogat Ramu NiCo Projek long Kurumbukari Main long Bundi na Basamuk Refinery long Raikos bai ating ol pipol bilong Basamuk na Ganglau bai weit yet long gavaman sevis inap tete.

Tasol ol laki long kisim dispela nupela hausik. Nau, ol i mas lukautim gut na husim long wei bilong em bilong wanem bai i gat plenty wankain helivim bai i kam long asples ananit long luksave bilong Ramu Projek MOA na tu long Nesinel Gavaman.



Baksan Masa i rerim sut long givim long pikinini.



Fri medikol sevis Ramu NiCo givim long ol asples lain long Naru.



Wanpela halevim Ramu NiCo i givim long Basamuk asples meri.



Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisinim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

'Wanpela Ramu NiCo, Wanpela Komyuniti'



Ol ausait pis kisim ples pinis long Wara Ramu

James Kila i raitim

PLANTI pipel long ol viles na hauslain arere long Ramu Wara i no amamas olsem ol pis bilong ausait i wok long kam na kilim indai ol tumbuna pis bilong yumi.

Ol manmeri i luksave pinis olsem ol tumbuna pis bilong wara bilong ol i wok long pinis bikos ol ausait pis i kam insait long kisim ples na tu, kilim indai ol tumbuna pis bilong yumi.

Dispela ol ausait pis em ol i bringim i kam long Esia.

Wanpela komyuniti lida bilong ples Moimara long Apa Ramu Riva eria long Usino-Bundi Distrik, Lape Pies, i tok bikpela Ramu Riva long Madang Provins nau i no moa lukim ol tumbuna pis bilong bipo olsem kolpis, kindam, malio na ol arapela samting bilong wara i go daun tru.

Mista Lape i bin tokaut long dispela long taim em i bungim ol envairomen opisa bilong Ramu NiCo long las mun insait long wanpela seve o wok painim na awenes ol Helt Envaironmen na Sefti lain bilong kampani i kamapim long Ramu Riva klostu long Ramu Projek eria.

Ol pipel i tokaut tu olsem dispela ol nupela pis olsem Java Carp, Komon Carp na

arapela pis bilong Esia we ol lain Fud en Egrikalsa Oge-naisesen (FAO) i bringim i kam long kantri i wok long bagarapim ol tumbuna pis bilong yumi, na namba bilong ol (ausait pis) tu i go antap na kamap planti tru long Ramu Riva.

Wanpela ripot *Wantok Niuspepa* i kisim i tok olsem long stat bilong 1980s i kam, i bin gat wanpela flaua bilong wara i wok long kamap na gro i go bikpela na pasim rot long wara we ol pipel i save ron i go kam long moto kanu na ol bot.

Olsem na bihain long planti toktok i go kam, ol lain bilong Dipatmen bilong Praimeri Indastri (DPI) i pasim toktok wantaim intanesenel oge-naisesen FAO long bringim ol pis long kaikai ol rut bilong ol dispela flaua na bai ol i dai.

Tasol taim ol i bringim dispela ol pis i kam, namba bilong ol i go bikpela tru na i daunim namba bilong pis bilong yumi.

Sampela ol manmeri insait long awenes i tok ol nupela pis we ol lain FAO i bringim i kam i gat planti bun.

Na planti taim ol manmeri i no save amamas taim ol i kukim dispela ol pis na kaikai.

Mista Lape i stori tu olsem ol liklik hanwara na tais tasol

long eria bilong ol nau i gat liklik namba bilong ol tumbuna pis olsem karua, makau pis, kindam, kuka na malio i stap.

Tasol ol pipel i pret bikos sampela ol ples lain yet i wok long yusim ol poisin rop bilong bus em ol i save paitim na wara bilong en i save go daun na kilim indai ol pis na kindam na malio insait long wara.

Planti ol pipel i tok olsem lo i mas stap long stopim na givim mekim save long ol lain bilong ples husat i wok long yusim poisin rop bilong bus long kilim indai ol pis long wara.

Ol i tok olsem ol lain husat i yusim ol poisin rop bilong bus long kilim indai ol pis long wara i nogat gutpela tingting long ol pikinini na tumbuna long bihain taim husat bai kisim pis na abus long wara.

Moabeta, kaunsel i mas holim pasim ol na putim ol long kot na ol i mas sem na stopim dispela pasin nogut bilong ol.

"Dispela ol kaulong lain i no tingim ol pikinini na tumbuna long bihain taim, na i wok long sotim namba bilong pis na abus long wara.

Olsem na moabeta ol kaunsel i mas putim lo na bikpela mekim save long ol dispela lain," Mista Lape i tok.



BELHAT: Bikman bilong ples Moimara i belhat na laik kaikaim nupela Java kap pis. **Poto: James Kila**



INO PLANTI STAP: Lape wantaim ol famili i soim ol tumbuna pis em liklik namba tasol i stap nau. **Poto: James Kila**

Ol welpam groa bai gat moa pawa nau

OL welpam groa insait long Wes Nu Briten bai kisim moa ol gutpela samting bihainim tok orait we Indipendens Konsuma Komisin Kompetisen (ICCC) i givim.

Long las wik, ICCC i bin sainim wanpela tok orait wantaim Hoskins Welpam Groas Asosiesen (HOPGA) we i givim ol moa pawa long toktok long salim ol pres welpam prut bilong ol i go long ol baia na em ol long Nu Briten Welpam na Hargy Welpam Limitet.

Aninit long dispel tok orait, ol groa i gat pawa long tok-tok long prais bilong ol pres welpam prut bilong ol.

Tu, ol bin laikim tok orait long stopim ol prut saplai i go long ol baia olsem hap bilong ol negosiesen o ol tok-tok long dispel samting.

ICCC i wanbel olsem dispel join negosiesen o tok orait we ol i wokim long ol prais na ol arapela kondisen wantaim wan wan kampani bai lukim ol groa i kisim moa ol gutpela samting.

Komisina na Sif Eksekyu-

tiv Opisa bilong ICCC, Billy Manoka, i tok dispel em i namba wan kain tok orait i kamap long PNG bai givim moa pawa long toktok long ol prais na ol narapela samting moa i go long ol groa na ol ken kisim gutpela mani long en.

Mista Manoka i tok ICCC i luksave olsem salim ol kes krop i go ovasis i kisim ausait mani bilong kantri i kam insait na olsem, ol groa i mas gat pawa long toktok wantaim ol kampani i baim ol prodak bilong ol. Tu, dispel bai mekim ol i skruim strong ol wok long planim moa kes krop.

Em i tok ol agrikalsa bisnis long ol rurel eria inap long daunim pasin tarangu na tu, pipel i ken wok long graun bilong ol na kisim ol gutpela samting.

Dispela bai holim ol pipel long ol ples na ol i no ken kam pulap long taun na kamapim ol hevi long ol haus i sot na ol arapela hevi moa.

Mista Manoka i tok ol groa i mas bihainim gutpela pasin

long go hetim ol dispela tok orait ol i kisim long ICCC.

Ol tok orait we ICCC i givim long HOPGA i bilong 5-pela krismas na em ol dispela.

● Em i laik bilong ol groa long stap insait long ol kain samting olsem stop wok o ol negosiesen;

● HOPGA bai lukim olsem ol memba bilong em i gat save olsem nogat lain bai fosim ol agensim laik bilong ol long go insait long ol straik, stop wok na ol narapela samting moa olsem;

● Ol ken toktok wantaim ol wan wan kampani long ol samting ol laik mekim;

● HOPGA bai givim ol gutpela infomesen long helpim ol groa;


● Karimaut ol negosiesen i trupela na;

● HOPGA na tupela welpam kampani i toktok wantaim ICCC na sanapim ol "benchmark" o ol bikpela samting long kamapim agri-men insait long 18-pela mun i kam bihain ol i givim tok orait.



SWIT MOA: Kagamuka Maket klostu long ples balus long Hagen, Isten Hailans Provins i pulap kapsait long ol naispela pres prut, kumu na ol gaden kaikai. Prais bilong ol tu i liklik tasol, olsem ol dispela naispela mau na swit painap mama ya i salim i stap long K2 na K3 tasol. **Poto: Nicky Bernard**

Mini Gems bai redim Team PNG bilong 2015



SAPOS Papua Niugini laik ol spots manmeri bilong ol i redi gut long 2015 Pasifik Gems orait, ol i mas statim ol wok redi bilong ol nau long redim ol dispela pilaia bilong ol.

Wanpela rot long redim ol dispela pilaia em long kisim ol i go long ol bikipela intanesenel pilai olsem Pasifik Mini Gems we bai kamap long Septemba dispela yia long Wallis na Futuna ailan.

191 manmeri bai makim PNG long dispela pilai we bai gat 145 pilaia na 46 ofisel na medikol manmeri stap insait long en.

I gat 8-pela spot we bai kamap long Pasifik Mini Gems dispela na PNG resis insait long dispela olgeta spots.

Planti ol spot husat bai go long dispela gem i wok go long planti ol arapela lokol na intanesenel trening kem na kompetisen tu.

Sampela i gat ol development program we i lukluk long ol yangpela pilaia husat bai krismas bilong ol i go bikipela na ol i ken stap long sinia tim long 2015 taim Pasifik Gems i kamap long Mosbi.

Tasol long nau yet, lukluk na tingting bilong olgeta i pas long mekim nois long Wallis na Futuna na olgeta wok redi bilong ol tim i wok long kamap klostu long pinis taim bilong ol bipo ol i kalap long balus.

Long las wik Sarere, laspela bung bilong tim i kamap long Sir John Guise stadium long Mosbi we Jenerel Menesmen bilong tim i sekim wanwan spot long lukim ol wok redi bilong ol i stap long we.

Planti tok ol i pinisim olgeta pepa wok bilong wokabaut pinis na i wokim tasol ol trening program bilong ol nau.

Wanwan husat i bungim hevi long stretim paspot i tok ol bai pinis long dispela wik na lukluk tasol long ol arapela samting long ol wik i kam bipo long ol i go.

Sef di Misin (Chef de Mission) o bos man bilong Tim PNG, Richard Kassman i tok amamas long wanwan menesa na kosa bilong ol tim long wokhat long lukim olsem ol samting i redi hariap.

"Dispela em i bikipela tim na i gutpela long yumi olgeta i wokbung gut olsem bai olgeta samting i ron gut tasol," em i tok.

Kassman i tok tu olsem Wallis na Futuna i no bikipela kantri na i nogat planti samting i stap long hap olsem i gat hia long Papua Niugini.

"Olsem na mi laik bai yupela i mas sekim gut na kisim olgeta samting we yu bai laik long yusim long hap bilong wanem em i liklik ples na sampela samting i nogat long hap," em i tok.

Tasol Mr Kassman i tok ol i noken wari tumas long dispela na i mas lukluk long pilai strong na winim ol medol bilong kantri.

"Husat i askim mi save tokim ol olsem mipela i kam long pilai, mipela i no kam tasol long soim pes na amamas o mekim namba nating.

"Em i Mini Gems tasol wanem gol medol mipela winim long hap em i gol medol tasol," Kassman i tok.

Long wankain taim, Tim i wok long kisim helpim i kam long ol sponza bilong en long helpim ol long dispela pilai.

Tupela sponza husat i helpim ol dispela wik em Trukai Industries na SP Brewery.

Trukai givim K500,000 we i kam long



Trukai Fan Ran dispela yia long Tim PNG dispela wik Trinda na SP Brewery i givim K100,000 olsem sponsip bilong ol long tim long Fonde, dispela wik tu.

Dispela tupelo kampani save amamas long helpim spots na ol i stap olsem tupela bikipela sponza bilong PNG Olimpik Komiti na Tim PNG tu.

Kassman i tok amamas long tupela wan-taim na strongim ol long gutpela pasin bilong helpim na wokbung ol i gat wantaim PNGOC na Tim PNG.

"Em i no isi long salim bikipela tim olsem i go long ol kain pilai ovais na mipela i amamas long kain helpim yupela i givim mipela,"

em i tok.

Tred Maketing Menesa bilong Trukai, Maryanne Hereva, i tok spots em i wanpela bikipela samting we i save kamapim planti gutpela samting insait long komyuniti na ol i save amamas long sapotim.

Em i tok ol i laik sapotim nesenel tim bilong PNG long helpim ol spotsmanmeri bilong PNG long pilai long intanesenel level bai ol i ken i gat moa save na strong long pilai agensim ol arapela kantri long kain ol bikipela gem olsem.

Jenerel Menesa bilong SP Brewery, Stan Joyce tu i tok ol i gat laik tu long helpim divelopmen bilong spots insait long kantri na dis-



pela em i wanpela rot bilong ol long helpim ol nambawan spotsmanmeri bilong kantri long traime save na strong bilong ol wantaim ol arapela kantri na apim nem bilong PNG long hap tu.

PNG tim bai lusim kantri long Ogas 31 na i go long Wallis na Futuna we ol bai stap na pilai nap long September 13 taim ol i kam bek.

Dispela Pasifik Mini Gems na tu Komonwelt Gems long 2014 bai tupela bikipela gem bilong Tim PNG long redim ol yet gut bipo long ol i bungim ol arapela Pasifik Kantri long asples bilong ol yet long Mosbi siti.



HOKI: Monica Siwin (lep han) bilong Sunam i resis long kisim bal taim Maltivies pilaia i traim long stopim em.

Ol Poto Nicky Bernard.

Ol spot eksen poto long wiken...




DIGICEL KAP: Fowed bilong Enga Mioks i sait step long Tigers pilaia long Digicel semi fainol. Mioks i winim pilai.



MIPELA WIN: Ol Enga Mioks pilaia i amamas taim pilai i pinis.



SOKA: Brain Tani bilong Blue Kumuls i putim bal aninit long lek bilong em taim Cosmos pilai i traim long rausim.



AUSSIE RUL: Yuni Tiger Anda 15 pilaia i kikim hot pela bal go long pilaia bilong em long AFL resis long Pot Mosbi.

- Weekend Sports Draws -

Digicel Cup Round 20

2013-DIGICEL CUP FINALS SERIES

WEEK 1 RESULTS: Gurias 28 Vipers 8 (Kokopo) Mioks 24 Tigers 16 (POM)

Week 20

SUNDAY, 25 AUGUST

Match 93: Minor Premiers vs Winner of Match: 91

Match 94: Loser of Match 91 vs Winner of Match: 92

TOKSAVE: Salim ol spots dro bilong yu kam long Feks; 325 2579, e-mel;bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



SPOTS DRO RAUN 24

Fraide: Ogas 23, 2013



Centrebet Stadium

Panthers V^s Broncos



ANZ Stadium

Rabbitohs V^s Bulldogs



Sarare: Ogas 24, 2013



WIN Jubilee Oval

Dragon V^s West Tigers



Skilled Park

Titans V^s Warriors



Townsville Stadium

Cowboys V^s Knights



Sande: Ogas 25, 2013



Canberra Stadium

Raiders V^s Sea Eagles



AAMI Park

Storm V^s Eels



Mande: Ogas 26, 2013



Toyota Stadium

Sharks V^s Roosters



Storm haf-bek Cooper Cronk i no inap slip long ol kainkain toktok i bin kamap long planti penelti tumas i bin kamap long gem.

Haf-bek bilong Melbourne Storm Cooper Cronk i lap tasol long taim kosa bilong Newcastle Wayne Benett i tok Storm i wok long slowim gem long kainkain penelti tektik. Ol i hamarim ol Melbourne long 10-4 long penelti kaunt long Sande long ol i kam bek wantaim 23-10 win long Hunter Stadium long suruk i go long 3-pela moa poin long sindaun long namba tu mak klostu wantaim ol Sydney Rooster.



KAKARUK SINGAUT:

Jake Friend i skoim wanpela moa trai long 9-pela trai long winim gem 56-14 antap long West Tigers.

Ol Sydney Rooster i wok long win yet i go bipo long fes maina primia-ship long 2004 nau ol i kilim dai lam bilong West Tigers wantaim 56 – 14 long Mande nait long Sydney Futbol Stadium.

Ol Tiger i bin go gut long namba wan hap bi-long gem long 14-6 bi-hain James Maloney i kikim penalti kik long las minit bilong gem i op.

Bihain nau em rot i klia long ol Rooster i soim planti masol tru long gem na waraim ol West Tigers i go long fultaim bilong gem.



Prop Andrew Fifita i pin-isim win bilong Cronulla long wanpela las minit trai 22-18 i kilim dai lam bilong St George Illawarra long Sarere las wik.

Todd Carney i misim kik long sait stret i givim 18-18 skoa mak long 6-pela minit i lep we Fifita i mekim wanpela hatpela trik long skoim las minit trai i givim gem long ol.

HAT TRU: Strongpela gem tru long Wollongong Stadium we Ol Dragon na Shark i pilai.

Raun 23 Poin Leda

Pos	Tim	W	B	L	D	Pts
1.	Roosters	17	2	4	0	38
2.	Rabbitohs	16	2	5	0	36
3.	Storm	14	1	6	1	33
4.	Sea Eagles	13	2	7	1	31
5.	Bulldogs	12	2	9	0	28
6.	Sharks	12	2	9	0	28
7.	Knights	10	2	10	1	25
8.	Titans	10	2	11	0	24
9.	Raiders	10	2	11	0	24
10.	Broncos	9	2	11	1	23
11.	Cowboys	9	2	12	0	22
12.	Panthers	9	2	12	0	22
13.	Warriors	9	2	12	0	22
14.	Dragons	6	1	15	0	16
15.	Tigers	6	1	15	0	16
16.	Eels	4	2	17	0	12

PNL's Information & Music Leader

FRIDAY 23 AUGUST

Vs

7.45PM
ANZ STADIUM

SATURDAY 24 AUGUST

Vs

5.30PM
SKILLED PARK

SUNDAY 25 AUGUST

Vs

2.00PM
CANBERRA STADIUM

LIVE GAME CALLS

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TASUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.6	TARI 100.5	WAU/SULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Tigers hangamapim but

Bustin Anzu i raitim

LAE Snax Tigers i hangamapim but bilong ol long sisen 2013 wantaim fainel pilai bilong wiken.

Bihain long pilai insait long dispela bikpela pilai resis long kantri, Tigers i go aut wantaim dispela lus insait long fainel.

Dispela nau i givim ol bikpela luksave olsem ol i wanpela strongpela tim agensim ol narapela tim long dispela bikpela pilai resis.

Bihain long nupela sponsa, Lae Bisket Kampani i kisim dispela tim long Lae Bombers, 2013 fainel em namba wan insait long liklik histori bilong ol insait long

ragbi lig.

Tigers i bin stat gut tru wantaim olgeta win bilong ol long hom pilai long stat bilong sisen, tasol ol pilai ausait long Lae i no gutpela tumas.

Wanpela bikpela hevi bilong ol long pilai ausait em ol i lus long Wabag na pait i bin kamap we wanpela sapota bilong ol i dai, nai sampela i kisim bagarap. Na tupela kampani kar i bagarap olgeta.

Ol i bin kukim tupela kar na bagarapim olgeta, na Papua Niugini Ragbi Futbol Lig (PN-GRFL) i stopim olgeta pilai long Aipus Oval long Wabag.

Kosa Stanley Tepend wantaim ol yangpela pilaia bilong en i pretim planti tim olsem Goroka Lahanis, Mount

Hagen Eagles, Mendi Muruks na Pot Mosbi Vipers long asples Lae Ragbi Lig pilai graun. Tasol ol i gat hevi long ol pilai ausait.

Ol pilai bilong ol long Goroka, Lloyd Robson, Rabi-amugl na Kokopo i no gutpela tumas. Na dispela i mekim ol i pundaun kamdaun long leda.

Tasol long sampela taim i go pinis, ol i bin lukautim namba wan posisen tu na mekim ol narapela tim i pret.

Tepend i kisim ol dispela bois bilong en long ausait i kam insait na wokim bikpela senis long pilai, tasol ol i nogat paia bilong pinisim dispela pilai bilong ol.

Kepten na fowet, Sydney

Fred, na helpim bilong em Roy Kela na Dama Philip, tupela eksperiens pilaia long sait bilong Tigers i no inap kamapim sampela gutpela nem bilong Tigers.

Long wanem, tupela laikim sapot bilong ol narapela fowet bilong ol.

Ol beklain olsem Thompson Tete na Bina Wabo i sot long save tu na laikim sapot bilong ol narapela beklain.

Tasol save i sot long ol fainel.

Kain fainols olsem save nidim man wantaim eksperiens.

Tigers i mekim gut long dispela yia na kam aut long fainol. Tigers em wanpela tim tasol long Noten Rijen.



Lukluk moa long ol Distrik Gem

STAT yet long 2003 taim ol bin statim PNG Gems ol o pilai, klostu olgeta provins i wok long lukluk moa long ol Provinsel Gem long makim ol tim bai go insait long PNG Gems.

Bihain long namba 5 PNG Gems, mi luksave olsem ol Provinsel Gavman i tromoim bikpela mani na ol risos long hostim o lukautim ol Provinsel Gem.

Gutpela plen mi lukim olsem i no inap westim bikpela mani em long holim ol Distrik Gem na em bai pulim ol gutpela lain i gat save long pilai.

Bilong holim ol Distrik Gem, ol pipel i gat trening long dispel eria aninit long atoriti bilong Distrik Edministresen wantaim ol Distrik Komyuniti Developmen Opisa bai karimaut.

Tasol pastaim, ol Komyuniti Developmen Opisa i mas kisim trening long plenim "event" o ol pilai olsem distrik gem, na menesim tu.

Ol Komyuniti Developmen Opisa bai trenim ol Wod developmen opisa, sapos ol i gat ol kain opisa olsem.

Taim ol i gat inap save woklain, ol bai wokim plening bilong ol distrik gem. Na tokim ol olsem "timing" o samt-ing i kamap long taim, o bihainim taim i bikpela samt-ing.

Taim eksasais i kamap, i nogat planti mani long sapotim wok plening, kos tasol we komiti i gat long en em long lojistik kos o kos bilong baim trenspot long en we bai kos 30 o 40 gren .Ol i mas putim insait long anuel baset o mani plen bilong ol long wan wan yia.

Bikpela samt-ing we dispela plen bai pulim em long ol nupela gutpela pilaia i save hait i stap long ol wod na ol LLG. Dispela em as tingting we ol bin statim PNG Gems long yia 2008. Dispela tingting na plen i kamapim sans long painim ol nupela pilaia long ol LLG na ol Wod husat bai go pilai long ol nesenel na intanesenel gem i kam i nap nau.

PNG Gems i no soim yet dispela samt-ing long ples klia. Liklik lain pilaia tasol we i hait i stap em Nesenel Federesen i kisim ol.

Ol Provinsel Edministresen i mas lukim dispela olsem rot long sevim kos na tu, kisim tingting long kisim Distrik Edministresen i go pas long ogenaism ol distrik gem.

Namba wan provins i go hetim dispel plen em long Sandaun Provins we ol i luksave long kos na ol talen o ol nupela pilaia long LLG na Wod level.

Planti gutpela samt-ing i ken kamap sapos ol i bihainim plen na go hetim.

Larim ol distrik i kamap papa bilong plen na ol i ken amamas taim em i karim kaikai.

Bintangor Goroka Lahanis lukluk long bukim fes gren fainol spot

Sape Metta i raitim

OL sapotas, folowas na bikpela namba bilong spektetas long Isten Hailans bai pulim lain na kapsait i go long hom graun long Nesenel Spot Institut (NSI) long dispela Sande long lukim Digicel Kap mesa semi fainol pilai we bai kamap namel long maina primia Bintangor Goroka Lahanis na Rabaul Guria.

Guria husat i bin ron bihainim Lahanis long namba 2 posisen long kompetisen points lada i kilim dai paia bilong Pot Mosbi Vipers 28 – 8 long fes raun bilong ol fainols long Kalabond pilai graun long Kokopo long Sande.

Bihain long dispela win, ol tobras bai katim solwara i

kam antap long NSI long Goroka long bungim ol Apo. Na mipela bai lukim dispela pilai olsem ripple bilong 2012 gren fainol na gren fainol pilai bilong 2013.

Dispela em i no liklik kompetisen pilai – em bikpela mesa semi fainol, olsem na ol Apo husat i no lusim wanpela gem long hom graun long NSI mas redi gut long bungim ol Tobras long Sande.

Lahanis i bin sindaun na malolo long wanpela wik na long dispela wiken ol boi Apo bai i go insait long pilai graun fres na redi long yusim gut ol biknem na ki pilaia long franlain olsem kepten Nicko Ubile, Gonzella Urakusie, Wesley Mohokule, George Abba na Yappa Kapu. Na long sapotim ol long ranim bal long beklain

na kamapim sans long skoa em John Arme na Adex Wera bai i go pas na tupela bai i ken kisim bikpela sapot i kam long Kevin Inagafa, Spiro Mikaive, Noel Zemming na Bernard Tatsim Junia.

Ubile, Urakusie Mohokule, Abba, Kappu, Arme na Wera em ol pilaia husat i save gut long fainol gem na presa futbol na ol i ken pilai strong long taim presa i kamap long taim bilong pilai.

Na wina bilong dispela gem bai i go stret long bukim fes gren fainol spot, na lusa bai go daun long pilaim wina bilong Enga Mioks na Pot Mosbi Vipers.

Lahanis i ken luk fowat long mekim gren fainol long wnen, em bai pilai long hom graun na wantaim ful sapot bilong ol lokel sapota em bai winim dis-

pela gem na i go antap long gren fainol.

Nau yet – frensais ona o papa bilong Lahanis tim Simon Sia apil long hom graun na wantim long stap isi na sapot gut long gutpela pasin, long wanem, sapos ol i no nap stap isi na sapot gut, ol Digicel Kap gem bai i no nap kamap long Goroka long ol arapela yia i kam bihain.

Em i go moa na tok, tim bilong em i no lus long NSI long dispela sisen. Olsem na sapos Guria i kam antap long bungim Lahanis, long lukluk bilong em- tupela tim i gat wankain strong na stail bilong pilai tasol Lahanis wantaim hom graun sapot bai i ken lukluk long winim dispela gem na i go long pilai insait long 2013 gren fainol we bai kamap long tupela wik i kam.

Vipers nidim disaplin long win Kait pilaia i go long Australia


Nicky Bernard i raitim

STOP N Shop Vipers i pinis long namba tri ples long lata bilong Digicel Kap resis long dispela yia 2013, ol bin flai go long Rabaul long wiken go pinis long pilaim namba tu tim long lata Gurias tasol bin lus long dispela pilai.

Dispela wiken bai ol pilai long hom graun long Pot Mosbi wantaim ol Enga Mioks long lukim husat tim bai pilai long narapela raun na husat bai hangamapim su bilong ol.

Vipers i gat planti long ol gutpela pilaia, na planti bilong ol tu i stap insait long trening skwad bilong Kumuls. Tasol long taim bilong pilai, planti bilong ol save mekim wankain rong long pilai graun na dispela save mekim ol lus.

Vipers save pilai gut long namba wan hap bilong pilai na dispela save helpim ol long win plati taim. Long namba tu hap bilong pilai, planti rong save i kamap we ol save givim planti penolti, dropim ol bal na difens bilong ol i save go daun olsem na planti tim i save winim ol long



Charlie Wabo holim win bilong Vipers.

namba tu hap tasol.

Vipers nidim tru disaplin long winim gem namel long ol na Mioks long dispela wiken. Sapos disaplin bilong ol i orait na hom graun tu i helpim, bai ol i winim dispela pilai bilong ol.

Mioks tu bai no inap isi long Vipers. Ol tu bai tingting long go insait long narapela raun bilong fainel long bungim lusa bilong Gurias na Lahanis we ol bai pilai long Goroka dispela wiken.

Mioks bin kam bek strong tru long pilai bilong ol wan-

taim Snax Tigers long wiken go pinis long Pot Mosbi. Tigers bin go pas long poin wantaim 10-pela minit bipo long pilai pinis Mioks kam wantaim tupela trai long winim pilai bilong ol.

Dispela wiken Vipers na Mioks bai brukim bun long Pot Mosbi na Gurias bai flai go long Goroka long bungim maina primias Lahanis. Wina bilong tupela bai go wetim gren fainel na lusa bai kam bungim wina bilong Vipers na Mioks, lusa bilong Vipers na Mioks bai hangamapim su.

BENNY KALI bilong Hula, Sentral Provins i lusim pinis Pot Mosbi bilong i go resis long sempionsip long Townsville, Australia.

PEPSI Max PNG i bin sponsa long yangpela kait spotsman, Benny long makim PNG insait long resis bilong kaiting sempionsip bai

kamap long pinis bilong dispela mun.

Long Trinde dispela wik ol famili bilong Benny wantaim sponsa bilong em, Pepsi Max wokman i go tok gutbai long em long Jackson ples balus long 7 kilok moning taim stret.

Ol famili bilong em i wari na i krai long em tasol ol i ama-

mas tru long em i go insait long wanpela nupela spot olsem long PNG. Long Sande 18 Ogas, Benny i bin soim stail bilong em long flai long kait long Ela Bis.

Nau em bai go mekim samt-ing tru long Townsville na PNG i ken wet na lukim em bai win.



Kaitman spotsman Benny Kali i werim pepsi max t-set na sanap wantaim famili long Jacksons ples balus.



Moa oil na meat insait



TUNA IN OIL

STRONGPELA WIN BILONG RESIS:

Ol resis kanu bilong Aroma kos na Abau i traim strong bilong win long wiken. Dispela resis Praim Minista i sponsaim long K20,000.

Poto Nicky Bernard.

K20,000 PM Kanu resis

Nicky Bernard i raitim

PRAIM Minista Peter O'Neil i givim K20,000 i go long ol pipel bilong Moapa ples long Aroma long lukautim kanu resis long Lokal Level Gavman (LLG) bilong ol.

Moa long 40 kanu long ol nambis bilong Aroma na Abau i bin stap insait long dispela resis stat long wiken i go pinis.

Minista O'Neil i givim dispela win mani long dispela resis long wanem dispela ol ples lain i gat nem long dispela pilai bilong solwara na win.

Presiden bilong Aroma kanu resis i tok tenkyu long praim minista long sponsaim dispela kanu resis bilong dispela yia.

Presiden i tok olgeta yia ol save holim dispela kanu resis bilong ol nambis lain bilong ol, na dispela yia wantaim sapot bilong memba bilong ol na praim minista dispela resis i go bikipela moa yet.

Wina bilong wanwan gret long dispela kanu resis bai go kisim kes mani bihain long olgeta resis pinis.





PMV

DIESEL OIL



BOROKO MOTORS

PORT MORESBY	☎ 325 5255
LAE	☎ 472 1144
MT HAGEN	☎ 542 1933
TABUBIL	☎ 649 9048
KIMBE	☎ 983 5035
MADANG	☎ 422 2659
KOKOPO	☎ 982 8193
GOROKA	☎ 532 3552

Email: info@borokomotors.com.pg
Website: www.boroko-motors.com

PMV OIL BILONG YUMI